

左恪靖侯奏稿續編

格靖奏稿續編卷三十六目錄

南路官軍剿辦潰卒擒斬首逆摺

覆陳周開錫辦理甘南軍務情形片

請追獎勞臣以昭激勸摺

審明叛逆眷屬按律擬議摺

穆生花眷屬黨與分別擬辦片

從逆武員王錫爵等凌遲處死片

南路官軍剿辦潰卒擒斬首逆摺

奏爲南路官軍剿辦潰卒頻獲勝仗擒斬首逆收輯餘眾一律肅清恭摺馳陳仰祈

聖鑒事竊范銘部眾挑選成營後餘眾潰變及辦理情形臣已於上年十二月十一日據實詳陳續據提督楊世俊張仲春等報稱該逆自十一月二十二日與官軍接仗後連次衝突均經擊敗擒斬頗多十二月初一初六等日周開錫調赴岷州會剿之涼州鎮總兵傅先宗前台灣鎮總兵劉明燈等各帥所部及臣親軍四哨並

安前宗岳各營先後到岷以岷城東南四五里之教場堡香芳崖地勢高峻俯瞰城中爲賊所必爭非築堅壘逼之不足以制其死命初八日各軍前往修壘楊世俊等料賊必出隊牽掣官軍與張仲春各率馬步列隊護之日午賊果以入股七八千人蜂擁出城分而爲兩一枝遮截楊世俊張仲春列隊之兵一枝直撲劉明燈傅先宗築壘之所各軍屹立靜以待之賊中鎗礮雨注呼噪甚急楊世俊劉明燈傅先宗俟其逼近揚旗伐鼓各軍如牆而進鎗轟矛刺擒斬二三百名賊勢披靡官軍

縱馬蹴踏步隊繼至銳氣百倍圍賊東南川中刀斫矛刺擒斬三四百名傷者無數敗賊負創狂奔入城日暮收隊官軍亦略有傷亡此十二月初八日官軍築壘潰卒出犯迎剿獲勝之實在情形也自是兵氣愈盛賊勢愈衰央人乞撫日三數輩然首逆畏誅並無一自縛來投者官軍知其未可遽許也仍更番攻擊炸彈所及樓堞多圯城中糧食且盡殺馬充飢每夜出攻堡覓食官軍屢邀擊之無所掠正月初八日大股賊自西門突出掠糧官軍伏於後根堡要其歸路賊至伏起陣斬悍目

師仲筵潘榮華等城中復出援賊三千餘迎戰傅先宗與提督殷華廷馬步各營馳截之斬馘千餘擒其悍目楊朶會尤得祥援賊大潰劫糧之賊亦大潰斬馘無算奪獲騾馬三百餘匹鎗械稱是餘賊駭走此上臘新正節次圍攻截剿獲勝之實在情形也劉明燈察知賊勢困蹙已極必尋隙突竄乃撥馬步四面加緊圍逼適署鞏昌府知府道員湯聘珍奉周開錫檄帶前由范營分出之平西營營官鄭福及差弁韋廷苞於十一日到岷鄭福韋廷苞均狄河人也令其入城諭潰卒毋相隨受

戮諸潰卒涕泣聽命十二日二鼓潰卒頭目胡海包天
成等隻身詣營乞撫並請先質妻子十四日潰眾齊出
乞撫傅先宗楊世俊劉明燈記名提督張仲春殷華廷
慰諭之令胡海包天成等呼首逆尤芝政安桐貞速出
尤芝政安桐貞見撫局已定十五日乃挺身詣營謝罪
傅先宗等傳集各降目數尤芝政安桐貞倡亂抗拒之
罪斬之以徇餘眾震懼帖服乃散粟賑飢軍挑其壯健
者分置各軍周開錫檄劉明燈編立副中一營臣親軍
四哨編增四營外尙有三千餘人歸傅先宗殷華廷編

營安插並填補缺額其老弱婦女萬餘則安置岷州檄
張仲春帶宗岳三營副白旗馬隊檄營鎮撫之檄署知
州呂恕編審安插給以賑糧種子督其耕作各令其力
而黑頭勇大股多寡強弱始有確數可稽卽范銘前此
所收之蘭州叛兵各處潰勇士匪及尤芝政等此次裹
脅之難民附和之遊勇亦水落石出可以逐一清釐矣
岷州紳民張旋乾邱映斗王映奎白生彩等數十名老
民數百名訴稱自前任徐楊知州招收黑頭勇日久嘯
聚愈眾始而攔路劫搶繼而攻堡殺人比賊尤甚近破

后所小山香房崖卧竜哈樹板達口龐家山北小路甘
寨野倉衆兒壩等寨請乘此兵威一鼓殲除周開錫諭
以首惡旣誅悍黨多就駢戮餘當曲貸以廣

皇仁仍慮土客仇衅旣深勢難並處分檄劉明燈傅先
宗殷華廷等各帶所編各營新收叛卒赴隴西伏羌秦
安駐紮慎選營官哨官訓練鈴束以期得力臣飭其清
查各案叛弁匪目及各省遊勇漸次分別辦理冀可銷
異患以固民心惟此次各軍將士和輯用命疊挫兇鋒
卒能擒斬首惡克平巨患微勞足錄其去冬攻堅陣亡

將士尙未據各軍開報前來可否由臣分別開單
奏請

獎卹之處出自

天恩所有潰卒被剿窮蹙擒斬首逆收輯餘眾鞏岷肅
清情形謹據實馳陳伏乞

皇太后

皇上聖鑒訓示施行謹

奏
同治十年二月二十一日

覆陳周開錫辦理甘南軍務情形片

再本月十二日欽奉同治十年二月初五日

寄諭前因周開錫辦理甘南軍務恐不得力諭令左宗棠隨時查察毋悞事機並令查明鞏秦各屬有無大股賊匪當此北路肅清南路防剿事宜甚關緊要朝廷實深慮繫近聞河州回匪三千有餘於去臘潛越洮河窺至岷州與官軍接仗復竄鞏昌阜陽川一路向東分股肆擾距秦州數十里之平南川娘娘壩鹽關李子園等處時有賊馬搶劫殺傷百姓岷州叛勇仍與官軍相持抗未就撫似此情形軍務尙無了日鞏秦爲甘省完善

之區前此並未大遭蹂躪乃自周開錫總統南路諸軍
既不禦外來之匪任其奔突又激變范銘之勇致與官
軍爲仇長賊勢猷若不及早廓清又成燎原之患著該
大臣乘北路肅清進將南路鞏秦一帶悉心布置盡殲
醜類范銘現在何處其所帶勇丁有不法者亟應嚴懲
有可用者卽應留以剿賊並非楚勇之外皆爲不可用
之勇且楚軍中亦未必無他省勇丁參雜其間所有范
銘營勇應如何分別措置之處該大臣當秉公辦理毋
得誤聽一面之詞以致僨事欽此跪讀之千悃勝惶悚

臣任大責重不能早紓

西顧之憂並以引用非才致煩

聖慮愧歎何言惟事關大局知而不言既乖人臣無隱之誼而言之過盡又適開議詢之端晝夜思維罔知所措謹就所見所聞事堪覆按者爲

皇上陳之

諭旨河州回逆三千有餘於去臘潛越洮河窺至岷州與官軍接仗復竄鞏昌岷陽川一路向東分股肆擾平南川一節臣遍閱鞏秦各府州縣去臘稟報實無河州

回匪三千餘潛越洮河關人鞏秦與官軍接仗之事惟狄道曾有河回出擾經河州鎮總兵王得勝兩次出隊旋卽卻走略有擒斬臣以無關輕重未及敘奏言者所稱與官軍接仗或卽指此然不獨未竄至岷州亦未竄至鞏昌也至阜陽川平南川娘娘壩鹽關李子園等處地當鞏秦之交去洮益遠從前狄道未復以前時有河回竄擾蓋洮東無軍駐守賊無所忌耳迨狄道旣復屏蔽相寬鞏郡迤南防軍林立洮河之可偷度者惟康家巖一處故安定會甯時有零騎竄越滋擾臣自參鞏

勇道員李耀南而不効鞏秦諸將者以此言者誤信
時謠傳遂以無據之詞入

告此臣所不及料也范銘皋蘭人所部黑頭勇多河州
狄道人甘肅官紳以其與河回仇怨素深冀其能出死
力與河回抗而黑頭勇在甘軍中猶爲出色前藩司林
之望力薦之任其展轉招致不加譏察卒之冗雜日甚
良楛雜糅愈不能戰而餉旣乏絕派捐民糧又以時被
河回驚擾人民死喪流亡地畝荒蕪無以供億遂棄所
駐之地就食岷州穆圖善規復河州徵南路諸軍由狄

道進剿初猶屢獲小捷繼藉口糧盡退走鞏秦敗不可
止據梅開泰王得勝等稱當時實因黑頭勇先潰牽動
各軍其詳固無從稽考然范銘全軍潰退則固無可辦
也上度隴之初見隴事敗壞至極無從措手心竊憂之
然兵事有緩急賊勢有重輕自應悉心斟酌遂決意取
遠勢進兵北路就近援南路而自率親兵駐中路以策
應南北兩路惟南路諸軍本不足恃又挫退之後銳氣
銷亡欲從新布署既苦欠餉過久撤遣無資且甘軍士
客混雜其土著固有室家之戀其客兵亦皆娶婦生兒

軍營惡習無所不有縱籌撤遣之資必將到手花銷仍
羈異鄉流爲游手貽地方異日之患適周開錫由閩解
餉來營見臣當食而歎遂自請赴南路一行臣乃令其
統所撥宗岳全軍平江兩營點驗甘南各軍截汰虛額
成營併歸總統兼理地方釐稅錢糧諸務剔除中飽以
蘇民困而濬餉源其間驕軍悍卒之囂陵同事之辜掣
皆所不免而周開錫守意自如中無所憚乃復滑源狄
道開屯田勸耕墾減陋規定津貼鞏秦之間民用大和
臣近接秦州士民留卸任秦州知州之稟鞏昌士民留

現署鞏昌知府之稟雖無歌誦周開錫之詞而所稱德政則皆周開錫所稟望施措者民情亦大可見矣言者謂鞏秦爲完善之區前此並未大遭蹂躪目周開錫總統南路諸軍以來既不能禦外來之匪又激變范銘之勇致與官軍爲仇長賊勢酸臣未見原奏不敢多辨然南路軍務地方已有起色臣豈次所奏甚詳范銘之變非由周開錫激成難逃

聖明洞鑒是非仍可覆按也軍中謠言最多鞏秦文武畏黑頭勇尤甚滑卒東竄之時號稱十數萬風謠四起

比楊世俊追剿疊勝人心稍定而追過禮縣時署知縣
蕭肇基運糧不及捏報楊世俊被賊截圍數段臣知其
誣撤委追楊世俊躡追至岷以銳進猛攻爲賊所乘致
挫羣議復作周開錫堅持不動比楊世俊傳先宗劉明
燈報臘八之捷微及撫局臣批示剿到極處乃可言撫
自首惡伏誅叛卒分起安插而羣詠亦漸息現在范銘
眷屬猶在蘭州應領糧食仍照常給領臣前奏范銘棄
軍走匿其下潰變或非其意所及惟尤芝政安桐貞罪
在不赦應剿撫兼施迭圖蔽事茲局勢初定范銘知臣

與周開錫無意殺之或赴蘭州自抄亦未可定惟頃接
見蘭州道張瑞珍坐補漢中知府林士班自秦州來談
及范銘一事據稱范軍未潰之先曾問范銘自言伊在
院帶兵自接護前撫翁同書親屬有功又素稱林士班
爲太世叔以其爲林之望堂叔也或請

旨刺下陝西撫

臣

蔣志章委藩司翁同爵督辦陝西軍

務

臣

劉銘傳委前藩司林之望前赴秦州會同鞏秦階

道唐啟修查明地方實在情形及周開錫辦理此案有

無激變情事以明

國是而釋羣疑可否之處伏候

聖裁至甘肅之有楚軍自都興阿多隆阿由湖北帶來
內多湖北投誠之眾嗣楊岳斌總督陝甘則湖南水軍
居多而皆名爲楚軍故蘭州歷設有楚軍糧臺不自臣
始也臣軍雖名楚軍而陸續選募各省勇丁頗多本不
僅楚人臣於楚軍固無所庸其徇庇合併聲明謹

奏

同治十年二月二十一日

請追獎勞臣以昭激勸摺

奏爲恭謝

天恩並懇

追獎勞臣以昭激勸事竊臣欽奉二月初二日

恩旨陝甘總督一等伯左宗棠臣籌決勝調度有方著
加恩開復降三級留任處分並加賞一騎都尉世職欽
此跪聆之下感激涕零不知所措竊念臣楚南下上章
句陋儒蒙

文宗顯皇帝特達

恩知於疑謗交集時

優擢京卿畀以幫辦軍務重任

皇上御極登承

寵渥游擢疆圻並荷

甄及微勞

錫封伯爵臣拜官不敢辭而受爵不敢不辭者竊謂官

者責以理人治事實心竇力敬慎以圖凡愚尙能自勉
至於爵賞則必功著當時名垂後世而後足以副茲

曠典而無忝竊之譏古人每以受爵不讓爲深戒暴得
大名爲不祥者非無見也乃再辭未蒙

俞允至今每署銜名猶深祗懼茲因巨憝伏誅復荷

芝綸蠲其夙售

恩施下逮實已至優極渥無可復加若復覲承

殊眷再叨世職之封上無橫草之功而受

賞緊附分茅之後實覺愧負前驅將士無以策後效而
勵將來伏念陣亡提督劉松山自秦晉轉戰燕齊返旆
以來復踰千數百里淨掃十數萬匪徒力攻四百餘賊
窟英銳忠勇絕少比倫不幸倉卒爲飛礮所中垂危之
際猶以金積未平屬所部努力報

國語不及私並飭其姪錦棠將遺骸葬吳忠堡必俟

事平始歸骨先隴昨金積既平劉錦棠搜得當時謀害
劉松山逆賊馬八條極刑處死瀝血以祭劉松山之靈
三軍雨泣臣提訊解到金積堡回眾均稱劉師亡後堡
中夜靜時聞戈馬之聲如怒潮湧至每月約三四次或
五六次賊中每疑官軍夜襲不敢解衣就臥而上年十
一月十六夜三鼓平涼城外忽聞大聲嗚嗚山谷響應
守城將士疑爲狼嗥開礮轟擊比縋城出視了無所見
臣時徘徊帳中覺其有異後得諸軍馳報是日馬化滌
就擒矣然則前史所載毅魄忠魂時露靈異誠未得謂

其盡屬虛語也臣與劉松山共事數年知其行軍律已實一時名將而一片忠愛之忱出於至性則古人實無以加每一追思悲痛不能自已合無仰懇

天恩將

賞加微臣騎都尉世職合之劉松山原得之三等輕車

都尉照三河殉難撫臣李績賓例

追賞劉松山令其嗣子董承襲則

盛典不虛前敵諸軍益知所感而微臣亦免忝竊之譏

感荷

鴻慈曷其有極謹附驛遞陳伏乞

皇太后

皇上聖鑒訓示施行謹

奏

同治十年二月二十一日

同治十年二月二十八日內閣奉

上諭原任廣東陸路提督劉松山由湖南軍營帶兵轉戰十餘省屢著奇功上年正月因督師進攻甘肅馬五寨獨匪中砲陣亡業經降旨優卹現在金積堡賊壘削平首逆就殲該提督靈柩尙未回籍追溯前勲尤深矜

恤劉松山著加恩賜祭一壇由左宗棠派員前往致祭以慰忠魂欽此

軍機大臣 字寄同治十年二月二十八日

上諭左宗棠奏南路官軍剿辦潰卒獲勝一摺范銘所部潰勇叛踞岷州經總兵傅先宗等督軍進剿獲勝陳斬逆首尤芝政等餘眾就撫業經發粟賑濟挑留壯健分置各軍編營安插其老弱婦女萬餘安置岷州給以籽糧督令耕作籌辦尙爲周妥此起潰勇人數龐雜前曾有焚掠刦搶之事該大臣慮及土客尋仇已將新收

叛卒分別飭赴隴西伏羌秦安駐紮勤加訓練著嚴飭各營妥爲鈴束毋令再生事端范銘所部該大臣已逐一清楚其另案叛弁匪目及各省遊勇尙恐隨處溷跡仍當檄令周開錫認真清查漸次辦理以靖南路而遏亂萌此次各軍剿撫潰卒著有微勞及去冬攻堅陣亡將士准由左宗棠分別奏請獎卹令片奏覆陳周開錫並無激變貽悞情形等語南路軍務既據該大臣查明詳細陳奏足紓厯系所請飭令蔣志章等派員前赴秦州查辦之處著毋庸議周開錫既能任事不避嫌怨所

有甘南軍務及地方釐稅錢糧已責成該道經理該大臣當飭周開錫聯絡各營及地方官和衷商辦不得一意孤行如有貽悞惟周開錫是問范銘現在是否投出仍著查明具奏另摺奏請將所得加賞世職追獎勞臣等語劉松山屢著奇功歿於王事朝廷軫惜殊深本日已明降諭旨賜祭一壇以慰忠魂俟甘省軍務一律肅清屆時再降恩旨該大臣請將加賞騎都尉世職追賞劉松山令其嗣子承襲之處著毋庸議將此由五百里諭令知之欽此

軍機大臣 字寄同治十年二月二十二日奉

上諭豫師奏籌辦西甯軍情等語西甯回眾頻年詭託就撫勾結外匪四處焚殺豫師以兵力不足驟難進攻暫擬鎮撫羈磨解散脅從以孤賊勢所籌尙爲因時制宜之計現在金積堡賊首馬化澂等業已伏誅羣賊自必聞風喪膽左宗棠卽應乘此聲威調派各軍規取河州等處兵貴拙速不貴巧遲諒該大臣全局在胸必已熟思審計迅速籌辦豫師業已函商左宗棠移軍狄河時豫爲分兵西進以便抽軍進紮著左宗棠斟酌情形

隨時與豫師妥籌辦理刻下西寧回情漸已斂迹窩藏
陝匪亦陸續西竄豫師仍當審度軍情按隊前進相機
剿撫不得徒託空言久延時日所請飭催山京等省協
餉已諭令各該省迅速籌解矣本日據英翰奏擊獲逆
首宋景詩供稱伊子今年二十歲聽說在西路營裏不
知真假等語該逆之子如在軍營迥迹必係詭託姓名
著左宗棠飭令各營留心訪察一經查出卽行奏聞將
此由五百里各諭令知之欽此

審明叛逆眷屬按律擬議摺

奏爲審明叛逆眷屬按律擬議請

旨飭部核覆遵行恭摺馳陳仰祈

聖鑒事竊臣前將金積堡首逆馬化澂暨馬耀邦馬建

邦馬正邦馬九馬三馬成澂馬恆邦馬定邦等凌遲處

死並將從逆要犯概予誅夷各情於同治十年正月二

十五日由驛馳報在案嗣復派員將逆屬馬玉澂馬五

十六馬五十九馬樹邦馬彥邦馬繼邦馬三和馬飛飛

馬化澂馬進孝馬由宗馬鎖馬沙杷馬七十子馬啞啞

馬阿西子等男犯十六名口馬馬氏馬譚氏馬閻氏馬
何氏馬毛抓抓馬毛亞亞馬三苗七名口又雇工牛占
元楊阿壯子等二十六名口僕婦使女等九名口一併
提至平涼委員審取確供臣覆加研訊馬玉濬卽馬七
係首逆馬化濬堂弟前經手繳過鎗礮係購自陝回均
不堪用並據僱工及其親屬等供該犯曾與馬化濬經
管鎗礮等項眾證確鑿應按照其謀反逆凌遲處死刑
凌遲處死僱工牛占元牛占寬本黑龍江回民據供在
馬化濬家受僱已十餘年往來包頭等處領本置貨同

治七年官軍進剿該犯卽在金積堡並未外出其同謀
抗拒可知應卽斬決比提馬玉澂牛古元牛占寬辦結
外其馬五十六係馬耀邦之子馬五十九係馬樹邦之
子馬樹邦係馬九之子馬彥邦係馬三之子馬飛飛係
馬成澂之子馬由宗馬鎖馬沙杷馬七十子係馬定邦
之子馬繼邦馬三和係馬玉澂之子均年未成丁訊明
不知謀逆情事應照反逆案內問擬凌遲之犯其子訊
明實係不知謀逆情事者無論已未成丁均解交內務
府開割發往新疆等給官兵爲奴例解交內務府照例

辦理馬五十六馬五十九馬飛飛馬由宗馬鎖馬沙把
馬七十子馬三和俱年在十歲以下應照例牢固監禁
俟年十一歲時再行解交內務府照例辦理馬化溥卽
馬九期服兄又馬定邦之父馬阿西子係馬九已死期
服兄馬化椿之子馬進孝馬啞啞係已死馬定邦期服
兄馬安邦之子應照緣坐男犯並非逆犯子孫例發往
新疆等處給官兵爲奴馬阿西子馬啞啞現今年在十
五歲以下應牢固監禁俟成丁時再行發遣查新章發
新疆之犯俱改發黑龍江惟現據賊供黑龍江亦有新

教之黨在彼傳教應改發閩廣給官兵爲奴至文犯馬
馬氏係馬化澹之妻馬譚氏係馬正邦之妻馬閻氏係
馬正邦之妾馬何氏係馬建邦之妻馬毛抓抓馬毛亞
亞係馬化澹之女俱應緣坐應照嘉慶十九年山東反
逆案發閩粵等省駐防爲奴除馬馬氏業據報病故驗
埋應毋庸議外其馬閻氏之女馬三苗例無緣坐明文
應准該犯婦帶赴遣所馬化澹之女馬毛抓抓馬毛亞
亞俱年幼應暫行收養俟及歲時再行發遣其訛無從
逆之僱工僕婦使女等均發交平涼縣安插擇配是否

如斯應請

旨飭部核覆遵辦再平涼縣監獄逼仄所有應行監禁收養男女各犯擬發交陝西按察使衙門分別辦理除將各犯姓名年歲開單咨送軍機處刑部查照外謹恭摺馳陳伏乞

皇太后

皇上聖鑒訓示施行謹

奏 同治十年三月初三日

軍機大臣奉

旨該部議奏欽此

穆生花眷屬黨與分別擬辦摺

再巨逆穆生花卽穆三其祖穆大阿渾傳習新教與馬化澂之父馬二交好新教中推爲大善人穆大阿渾臨死以其帶服白帽紅衣傳之馬化澂令其衆歸馬化澂管束穆生花與其弟穆四穆五均爲新教阿渾行教於秦安清水交界之蓮花城一帶與馬化澂互相首尾馬化澂賊其攻陷平涼府城固原州城其陷城也屠戮民人慘酷殊甚平涼爲甘肅中路大郡承平時城內外煙

戶不止數萬亂後僅存百四十七戶男女丁口不滿七
百縱橫數百里煙火寂然而白骨黃茅彌望皆是遺黎
泣訴被禍之烈爲古今所未有也穆生花與其弟兄夥
黨旋遷居金積堡助馬化澂抗拒大兵上年五月穆生
花以求撫未得知罪無可逃仰藥自盡金積堡平後陳
湜黃鼎搜獲穆玉軍前正法解其眷口夥黨赴平涼平
固民人以穆生花兄弟實逆案渠魁其眷口夥黨呈請
按律擬坐臣擬俟其解齊片案分別擬辦以昭炯戒而
快人心謹附片陳明伏乞

聖鑒謹

奏 同治十年三月初三日

從逆武員王錫爵等凌遲處死片

再從逆武員王錫爵鐵秉忠兩犯經臣於審辦通逆犯

官彭慶章摺片內聲明解訊懲辦嗣據陳湜等稟解王

錫爵鐵秉忠時續將袁世榮一犯一併押解到營臣親

加提訊據王錫爵供稱雲南蒙自縣回民由武進士花

翎待衛報捐都司分發甘肅隨征立功保升花翎遊擊

前陝甘總督樂斌委署花馬池營參將同治元年經甯

夏鎮派令帶兵一千名赴陝防堵在北關外偵探賊蹤
卽同所帶回兵數名投入陝回鄒保和賊營七年四月
同陝回到董志原其眷口在花馬池者先已移至金積
堡該犯遂入金積堡同住據鐵秉忠供陝西長安縣回
民由行伍出征歷保藍翎都司銜守備前護陝甘總督
恩麟委護靈州營參將同治八年十一月馬化澂遣逆
黨襲陷靈州城該犯投賊攜眷移住金積堡據袁世榮
供陝西鳳翔縣回民由行伍出征歷保花翎都司銜守
備署陝西磚平營都司同治七年擊眷投賊移住金積

世榮均係從逆武職王錫爵
並以女嫁馬化澂之孫爲妻訛各賊供當官軍進攻金
積堡時王錫爵袁世榮與首逆馬化澂之子元惡馬耀
邦分守西南北各城抗拒官軍最爲盡力尤屬罪大惡
極覆載難容臣於研訊明確後卽將王錫爵鐵秉忠袁
世榮三犯一併凌遲處死以昭炯戒理合附片具陳伏

乞

聖鑒施行謹

奏

恪靖奏稿續編卷三十七目錄

南路各軍截剿竄匪獲勝摺

請禁絕回民新教摺

湘軍異常出力各員先行請

獎摺

叛逆穆生花等各屬按律擬議摺

覆陳吳士遊擅殺游擊朱德樹案由摺

搜剿竄賊疊勝摺

南路官軍剿賊獲勝片

進規河州一時未能進取片

覆陳甘涼肅等處情形會籌布置摺

軍機大臣 字寄同治十年四月初十日奉

上諭金順奏回匪被勦求撫現籌妥辦一摺通貴餘匪遁入納家閭後與納萬郭等匪黨伺隙逃竄叠被官軍攔擊無路可逃擒斬著名首夥多名敗匪潰奔入寨窮蹙求降金順會商張曜勒令此起回眾盡繳馬械平毀寨牆若能悔罪輸誠將藏匿器械繳清聽受約束卽著該署將軍等分別妥爲安插予以自新倘敢怙惡不悛心懷疑貳仍著督兵痛勦毋畱餘孽甯靈西岸回務金順與張曜會商辦理總當分別良莠相機勦撫不可

草率了事其投出靈州回民二百餘名金順已遣令東渡由該地方官收管安插著左宗棠飭令劉錦崇黃鼎遇此項回民抵籍卽劄行該管地方官隨時箝束妥籌安置毋令失所免致滋生事端陣亡之副將銜遊擊向清蘭把總吳天恒守備秦得銀王勝喜均著交部從優議卹金積堡攻復後左宗棠究從何路移營作何布置河狄匪勢若何如何設法進剿該大臣自應統籌全局將賊匪次第盪平何以日久尙未奏及殊深慮系著卽將籌辦情形據實具奏不得稍涉遲回致負委任前據

福濟等奏拏獲賊探成娃子係甘肅平番縣人寄居肅州據供同治八年楊軍門與回回講和上年八月內回匪十人持楊軍門票出來貿易隨後出來五百人又有穆姓二人持楊軍門印票赴將軍公旗下貿易後跟賊三百多人等語所稱楊軍門是否即楊占鼐有無此等情事著左宗棠查明具奏將此由五百里各諭令知之欽此

南路各軍截剿竄匪獲勝摺

奏爲南路各軍截剿河州竄回階州剿回連獲勝仗恭
摺馳陳仰祈

聖鑒事竊臣前因安定會甯時有回逆零騎竄越滋擾
儆飭該處附近防營隨時搜剿以靖地方正月二十四
日督帶平江左右兩營總兵蕭賞謙率隊出向會甯一
帶搜剿行五十里至老河溝遇賊馬三百餘騎蕭賞謙
揮隊衝擊適分駐康家堡華家堡哨隊繼至敗之賊由
馬營東北向通渭大路竄走旋分而爲兩一踞該縣後

川舖旋竄舖路鎖一竄城西北三十里之坡兒川瓦房堡一帶旋竄城東北四十里之黃家窰擾及秦安清水各縣界適統領奇捷馬步等營提督楊世俊勦平岷州潰卒周圍錫徽令赴秦州秦安適中之石佛鎮駐紮訓知清水界內有另股賊竄秦州街子口立飭所部馬隊馳往截剿並函會駐紮洛門鎮之總理宗岳全軍營務提督張仲春截賊由監關西竄之路張仲春二月十一日得報後詢知賊竄四門寨東四十里之廖家莊十二日黎明自率宗岳禮營及副白旗馬隊馳抵廖家莊賊

蘇睡未起官軍四面圍擊賊驚覺死拒官軍鎗礮矛刺
斬賊殆盡奪獲騾馬二百餘鎗械稱是訊據擒賊供稱
此股頭目張運隆係河回偽領員正月十三日由河州
竄出現在張運隆已斃於陣楊世俊又調有另股分踞
素安縣北魏家莊王家舖一帶復調各族馬隊北趨任
當川扼賊東竄並添調黃白兩族四成隊合力圍之十
一日退賊於任當川賊瞥見官軍向西飛遁官軍窮追
三十里天曉露宿十二日五鼓追及李家店偵賊熟眠
弛備官軍急起掩之斃賊二百餘名生擒三十餘名奪

獲騾馬七十餘匹鎗砲各數十件餘賊負創狂奔官軍
躡追至靜甯柏子岔沿途擒斬甚多十三日黎明追至
馬家岔復痛勦之餘逆鮮有脫者收隊後查點官軍僅
陣亡勇丁二名受傷九名訊據擒賊供稱賊首沙母隨
子馬尒四等由河州北莊三甲集竄出現軍斃於陣矣
餘賊七八十名狂竄西和禮縣界復經提督蘇家良丁
桂智縱馬追斬無遺此次河州馬步各賊共計不過千
餘由安定分竄通渭秦安清水秦州西和禮縣各界颺
忽狎至旋轉如風經各軍迎頭截尾殲除殆盡地方幸

免蹂躪無悞春耕此鞏秦各屬勦辦獲勝情形也其另
股回匪由成縣竄階州白馬關卡者代理州判烏克松
阿力不能制二月二十九日竄及階州南路太石山守
卡都司李宏珍擊敗之賊折竄黃鹿山管帶楚勇署階
州知州道銜陝西補用知府洪惟喜派副將鄧光耀率
所部馳扼羅家堰派副將彭德沅遊擊王斌武守備周
正秋率所部緊躡賊後遊擊李廣全率親兵團練扼紮
大水壩遊擊胡彪率親兵中哨扼紮小關嶺嚴陣以待
賊竄黃鹿山團丁列隊兩旁巖谷彭德沅王斌武周正

秋率隊擊之鎗矛並舉斃悍賊三十餘名奪騾馬二十
八匹賊紛紛潰走圍丁奪獲騾馬五十餘匹賊竄向大
水壩李廣全擊敗之三月初一日賊折由五房出竄彭
德流擊卻之復折竄羅家堰初二日鄧光耀擊之斃悍
賊十餘名奪騾馬五匹洋砲一桿刀矛數件賊翻山紛
竄圍衆截獲騾馬甚多追至小關嶺胡彪率所部迎擊
之斃悍賊十餘名敗賊向禮縣雷家壩一路遁逸此階
州勦辦獲勝情形也臣查河州逆回從前無事時卽多
騎馬遠出肆行劫掠之案與撒拉及米喇各回性情相

似自甘南各軍復狄道憑洮設守屏蔽稍寬賊復從下
游安定一帶繞道南犯蓋因官軍方勦潰卒妄意有隙
可乘也此次竄賊雖不過千餘然分支狂騁頗爲慄悍
見官軍至輒望塵先遁瞬息無蹤幸岷州事定官軍扼
要分駐地網四張卒亦無能善脫現地方安謐臣已調
提督銜前台灣鎮總兵劉明燈帶所部馬步入營進駐
馬營監以向安定徐文秀撥所部四營由靜甯州延紮
會甯一面修治蘭州中大道以利輓運一面轉般軍糧
子藥儲存靜甯州城以規進取蓋地荒已久人煙稀絕

籌措艱難不得不次第爲之而進軍必先清後路通餉道又一定之局也所有南路官軍勦賊獲勝情形謹會同甯夏將軍臣穆圖善恭摺據寔馳陳伏乞

皇太后

皇上聖鑒訓示施行謹

奏

同治十年四月初八日

軍機大臣 字寄同治十年四月十六日奉

上諭左宗棠奏南路諸軍截勦賊匪獲勝一摺河州匪分竄鞏秦各屬疊經官軍擊敗逆首張運隆沙毋驢

子等均斃於陣匪黨殲除殆盡另股回匪由成縣擾及階州亦經鄧光耀等擊退此次由安定南犯之賊不過千餘而分支狂竄勢頗剽悍誠恐該逆先以小股嘗試繼將大股出竄以圖一逞左宗棠現調劉明燈所部八營進紮馬營監以向安定徐文秀撥所部四營由靜甯州延紮會甯並馳運軍糧以規進取著卽妥籌布置剋日進兵以期節節掃盪前據左宗棠奏稱撫回率得昌來赴河州曉諭近日該處情形究竟若何該大臣務當相度機宜速籌攻剿斷不可任其觀望遲回致墮緩兵

之計金積堡收復後北路有無餘孽潛藏應否留兵駐
紮並如何調派各營分投西進之處均著詳細奏聞將
此由五百里諭令知之欽此

請禁絕回民新教摺

奏爲請禁絕回民新教以弭衅端而崇

聖化事竊回民以西戎族類雜居中土自古已然載籍
詳矣就回民自數之典言之祖曰阿丹生於天方之野
產七十二胎每胎男一女一自爲夫婦至喇撒而其教
始興又六百年當隋開皇中有穆罕默德者生而神靈
闡明清真之教回衆翕然從之其教始盛今回民稱天
方教自稱曰穆民以尊穆罕默德故也又曰膜民以阿
丹初生之祖言也其書有天經一部回族稱爲穆罕默

德所受之天者又天方性理天方經典兩部則明代金陵回人劉智所撰皆發揮天經遺意以華人文字潤色之其教以識主爲宗旨似儒者所言明心見性以敬事爲工夫似儒者所言制外養中其教規所謂天道者五
一曰唸謂誦經一曰禮謂報恩一曰齋謂絕物一曰課謂忘己一曰朝謂歸真所謂人事者五謂倫常之理七日一禮拜亦與泰西各國同蓋其原本出於天主耶穌而時雜以佛民之說稱華人爲大教自稱小教非如奇衰詭異之流專以句結爲事煽誘爲能也是故雜處中

國千數百年婚姻未通俗尙各別傳習不同而未嘗敢
萌他志歷代任其判詠於區宇之內譏禁無聞我

朝錄其人才准其仕進回族由文武科甲得官擢至督
撫提鎮者亦不乏人固未嘗以其遊於中國而外之也
乾隆年間兩江督撫臣奏回教不宜留於中國

高宗純皇帝特加訓飭

聖謨洋洋足爲百世法矣乾隆四十六年逆回馬明心
蘇四十三由西域歸詐稱得天方不傳之秘創立新教
煽惑愚回謀爲不軌四十九年田五繼之大軍先後致

討罪人斯得然其根株未能淨絕也嘉慶年間有穆阿
渾者與首逆馬化澂之父馬二復以新教私相傳授至
馬化澂而其燄漸張復託名經商到處煽惑回民行其
邪教近據各賊供

京師齊化門直隸天津及黑龍江吉林之寬城子山西
之包頭暨湖北漢口等處均有新教徒黨在彼傳教其
傳教之人曰海里飛如內地之稱經師曰滿拉如內地
之稱蒙師而品望皆在阿訇之次馬化澂則自稱總大
阿訇也其教規大略與回回老教亦同惟老教誦經則

合掌向上新教則兩掌向上而不合老教端坐誦經新
教則夥誦唧噥頭搖而肩聳老教送葬不脫鞋新教脫
鞋送葬凡茲細節異同固無關彼教輕重然新教之所
以必宜斷絕者爲其自託神靈妄言禍福行爲詭僻足
以誘惑愚回俾令甘心役使同陷大逆而不知加以顯
戮而不悔一如白蓮清香無爲圓頓諸邪教之足以釀
亂階而禍天下也臣於金積各犯解訊時細心推鞠有
供稱馬化澂能知未來事者如遠客來訪必預知同伴
多寡之數從前官軍攻勦衛靈馬化澂父子兄弟悉衆

抗拒預言官軍將退回民無事之類有供稱馬化澂時
露靈異療病則愈求嗣則得之類有供稱馬化澂於投
入新教之人向其自陳過犯罰撻皮鞭代爲懺悔即可
免罪之類回性多疑善詐異於常人然一經新教蠱惑
卽如醉如癡牢不可破方金積長圍久合時陝甘各回
饑困殊常至殺人以食而馬化澂父子兄弟藏有餘粟
無敢竊議之者迨局勢危迫至極猶且互相寬慰謂總
大阿訇必有保全之法馬化澂詣營求撫意在一身塞
咎見好請回而諸回目踵營看視者日凡數輩見馬化

怪觀雙膝齊跪不呼之起不敢起如非迷惑陷溺之深豈宜至此茲幸誅夷遷徙異患可冀永除惟新教傳染已廣回民聚集之處率有傳習新教之人不及時嚴加禁絕仍慮歷時稍久故智復萌不逞之徒時思竊發又將重煩兵力也除已獲海里飛阿訇諸逆穆四穆五馬承祺牛占元牛占寬等業經訊明懲處未獲之金師傅馬篆鮮二等咨行各省一律捕治外一面出示曉諭所屬各府廳州縣回民嚴禁傳習新教其從前誤被新教迷惑之人概准自首悔教免其治罪庶幾漸趨覺路永

拔迷津新教絕而回族安關隴可保百年無事也至各省傳習新教爲時尚淺良回僉稱新教傳染雖廣各省回民亦頗知爲彼教異端多有不肯違信者如黑龍江回民約二千餘而傳習新教者僅祇百餘卽其明驗若乘此時嚴加諭禁無難預杜亂萌台無仰懇

聖慈飭下各將軍督撫大臣嚴禁回回新教出示轄境各回寺嗣後遇有新教阿訇海里飛等到境煽誘回回卽由各回寺首董縛送所在官司訊明懲處其從前被誘誤入新教之人仍准首悔免罪則愚回有所懼良回

有所慕不但地方可臻安謐卽回民亦長荷

高厚保全之恩於無既矣臣每繹

廷旨分良匪不分漢回敬仰我

皇上仁育義正之德上符

高宗寶握千古治戎機要謹就愚陋之見據實陳

奏伏乞

皇太后

皇上聖鑒訓示施行謹

奏 同治十年四月初八日

軍機大臣 字寄同治十年五月初六日奉

上諭左宗棠奏請禁絕回民新教一摺所稱乾隆年間
逆回馬明心等創立新教惑眾滋事先後伏誅根株未
絕至馬化澂之父馬二等復以新教私相傳授遂至釀
成變亂皆由新教行爲詭僻足以誘惑愚回迷而不悟
現在馬化澂雖已伏法而新教傳染漸廣必須嚴加禁
絕以杜亂萌等語所奏自爲思慮豫防起見惟回民散
居各省同隸編氓各安生業若因區別舊教設爲厲禁
地方官稍不加察書吏藉此搜求騷擾必至回眾驚疑

轉生枝節從前乾隆四十九年回逆田五等滋事以後
欽奉

高宗純皇帝聖諭查辦此事止當分別從逆與否邪正
之殊不必論其教之新舊欽此嗣於乾隆五十四年經
勅保奏稱新教爲回教之大害擬令靜甯等處頭人訪
察稟首復奉

聖諭令其設法化導不可區別新舊之名仰見

垂訓周詳具有深意此次馬化澂倡亂及身旣被刑誅
徒黨亦遭殲戮正可借此剴切曉諭俾該回衆等及早

改悔不至誤入迷途自陷罪戾該督現既出示所屬州縣禁習新教並准自悔免罪仍著嚴飭該地方官妥爲開導不可操之過蹙致激事端所請飭令各省一體禁絕之處可從緩辦理也將此諭令知之欽此

湘軍異常出力各員先行請獎摺

奏爲遵

旨將湘軍異常出力各員先行擬請

獎敘並續查湘軍在事最久戰功最著各員懇請

恩施恭摺馳陳仰祈

聖鑒事竊臣前因金積逆巢蕩平元惡悍黨概行殲除
將在事出力各員先行擇尤隨摺請

獎嗣於同治十年二月初二日欽奉

上諭金積堡首要各逆馬化澂等均已伏誅甯靈肅清

本日已明降諭旨將左宗棠等及出力各員分別加恩
獎勵矣章合才等十二員統帶湘軍異常出力此次所
有勞績著左宗棠先行擬請獎敘仍著該大臣存記俟
甘肅全省廓清再行奏請恩施等因欽此仰見我

皇上於慎重名器之中仍寓激勵將士之意當卽恭錄
分行去後茲據總統老湘全軍三品卿銜雲騎尉世職
道員劉錦棠將所請世職之章合才等十二員改擬獎
敘懇為核奏並稱此外尚有記名提督易致中譚拔萃
余虎恩李占椿潘運璋譚上連等六員在事最久戰功

最著懇一併先爲奏請

獎敘等情前來臣查章合才等十二員係奉

旨由臣先擬獎敘仍行存記之員茲據劉錦棠擬獎前來應卽先爲奏懇

恩施至記名提督易致中等六員均係湘軍營官始終在事勞績最著自應一併先爲請

獎以昭激勸所有前擬請世職之頭品頂戴記名簡放提督江蘇蘇松鎮總兵

賞穿黃馬褂法福陵阿巴圖魯章合才頭品頂戴記名

簡放提督

賞穿黃馬褂綳武巴圖魯蕭章開頭品頂戴記名

簡放提督

賞穿黃馬褂達桑阿巴圖魯陶定昇頭品頂戴記名

簡放提督

賞穿黃馬褂呼敦巴圖魯李雲實等五員擬先請

頒賞物件前擬請世職之頭品頂戴記名提督綳武巴

圖魯喻執益頭品頂戴記名提督請換清字勇號曾松

明頭品頂戴記名提督穆精阿巴圖魯王承贊頭品頂戴

記名提督請給清字勇號尹興茂頭品頂戴記名提督
剛安巴圖魯周雲祥頭品頂戴記名提督請換清字勇
號席大成等六員擬先請

交部照一等軍功例從優議敘前擬請世職之頭品頂
戴記名

簡放提督倭什洪額巴圖魯熊有常擬先請

賞穿黃馬褂其在事最久戰功最著之頭品頂戴記名
提督圖勒炳巴圖魯易致中記名提督請換清字勇號
譚拔萃頭品頂戴記名提督奇車博巴圖魯李占椿頭

品頂戴記名提督達春巴圖魯潘連璋頭品頂戴記名
提督請換清字勇號譚上連等五員均請

賞穿黃馬褂頭品頂戴記名提督奇車博巴圖魯余虎
恩請

賞給三代正一品封典以示優異所有遵
旨將章合才等十二員名先行擬請

獎敘並續保各員緣由謹繕摺馳陳伏乞

皇太后

皇上聖鑒訓示施行謹

奏同治十年四月初八日

同治十年四月十六日內閣奉

上諭前因甘肅金積堡賊巢盪平提督章合才等統帶
湘軍異常出力當經諭令左宗棠先行擬請獎敘仍存
記俟甘肅全省廓清再行奏請恩施茲據奏稱遵旨先
行請獎並續查出力各員懇請一併給獎等語該員等
勦賊出力著有勞績自應量予獎勵提督章合才肅章
開何作霖陶定昇李雲貴著各賞給白玉翎管一支白
玉搬指一箇玉柄小刀一把大荷包一對小荷包兩箇

諭執益曾松明王承贊尹興茂周雲祥席大成均著交
部照一等軍功例從優議敘熊有常易致中譚拔萃李
占椿潘運璋譚上連均著賞穿黃馬褂余虎恩著賞給
該員三代正一品封典該部知道欽此

叛逆穆生花等眷屬按律擬議摺

奏爲審明叛逆穆生花穆四穆五等眷屬按律擬議請
飭部核覆遵行恭摺馳陳仰祈

聖鑒事竊臣前將叛逆穆生花仰藥自盡搜獲穆四穆
五軍前正法各情於同治十年三月初三日奏報在案
並聲明俟黃鼎將逆眷解齊再行分別擬辦拜摺後臣
恐解到難民或有逆屬隱匿在內卽飭委員認真查訊
嗣據委員稟稱在各起難民內查出穆生花之妻穆馬
氏妾穆米氏子穆風娃穆馬十女海兒迷花兒五兒哈

兇蠻穆風娃之妻穆楊氏穆馬十之妻穆王氏穆四之妻穆王氏子穆哈兒閉穆買四穆哈兒閉之妻穆馬氏穆五之妻穆張氏子穆蛋兒穆擺開並顧工等八名共二十五名口一併拿獲稟請核辦前來臣以穆生花等眷口既經黃鼎等看押何以平涼復查出多名不勝詭異當飭黃鼎將所押逆眷送解來平以憑審辦嗣據黃鼎將所押逆眷十三名解到委員提審據平涼查獲穆生花等眷口供稱穆四穆五正法後該逆眷等自知情罪重大變易姓名混入各起難民解來平涼希冀交插

幸免並供認穆生花穆四穆五傳習新教屠城戕官不諱黃鼎解到逆眷內僅穆四之妾穆楊氏一名係屬真犯餘皆親屬顧工冒名頂替同情狡詐至於此極查穆生花穆四穆五皆係叛逆首犯其眷口自應照謀反大逆例分別問擬除穆生花上年仰藥自盡穆四穆五軍前盡法懲處毋庸再議外穆生花之子穆風娃穆四之子穆哈兒閣二名應照謀反大逆子孫年十六歲以上緣坐例辦理臣於定擬後卽監提該二犯正法其穆生花次子穆馬十穆四次子穆買四穆五之子穆蛋兒穆

擺開等四名年俱在十五歲以下訊明實係不知謀逆情事應照謀反子孫實係不知謀逆事情者無論已未成丁均解交內務府關割發往新疆等處給官兵爲奴例解交內務府照例辦理穆賈四穆蛋兒穆擺開三名俱年在十歲以下應照例牢固監禁俟年十一歲時再行解交內務府照例辦理查新疆發往新疆之犯俱改發黑龍江黑龍江現有新教之黨在彼傳教應改發關廣等省給官兵爲奴穆生花之妻穆馬氏穆四之妻穆王氏穆五之妻穆張氏穆生花之長女穆海兒述三女

穆五兒五名係反逆之妻女俱應緣坐應照嘉慶十九年山東反逆案發閩廣等省駐防爲奴穆生花之次女穆花兒四女海兒蠻二名訛係自幼過房與人應照過房與人不坐例免其追坐穆生花之妾穆米氏穆四之妾穆楊氏穆生花長子穆風娃之妻穆楊氏次子穆馬十之妻穆王氏穆四之子穆哈兒閉之妻穆馬氏俱係反逆子妻亦應緣坐惟訊供皆係搶擄霸佔而來查反逆案内未載搶佔婦女免其緣坐明文惟強佔良家婦女律內無論爲妻妾及配子姪除本犯科罪外婦女不

坐離異給親既應斷離是與該犯已無名分應傳其親屬具領擇配其訊無從逆之僱工戚屬人等均發交平涼縣安插是否如斯應請

旨飭部核覆遵辦其應行監禁各犯仍發交陝西臬司衙門分別辦理除將該犯姓名年歲開單咨送軍機處刑部查照外謹恭摺馳陳伏乞

皇太后

皇上聖鑒訓示施行謹

奏
同治十年四月初八日

覆陳吳士邁擅殺游擊朱德樹案由摺

奏爲遊

旨覆陳仰祈

聖鑒事竊臣欽奉上年十月二十日

諭旨前據左宗棠奏中書吳士邁在營病故請將擅殺
遊擊朱德樹之案免其查參當以該遊擊本有違令應
得之罪是以降旨允准茲據都察院奏該游擊之兄朱
積善遣姪朱常久呈稱本年三月間賊匪羅局鎖吳士
邁令朱德樹攻東路因賊撲武字營甚急卽率各營力

戰解圍迨赴羅局已無賊踪吳士邁卽責以違令將其
斬首復以吳士邁所稟朱德樹侵吞餉銀等情係吳士
邁跟丁朦保知縣之曾貴和等挾嫌讒構請昭雪給
予旌卹等語朱德樹被殺一案是否寔有寃抑著左宗
棠按照所呈各節確切查明據實具奏毋稍含混原呈
著鈔寄閱看等因欽此臣查上年三月逆回崔三禹得
彥竄擾陝西臣調統領宗岳軍已故中書吳士邁率所
部剿之於寶雞之陳村岐山之羅局連獲大捷吳士邁
因羅局之戰所部營官朱德樹違令不赴羅局之東截

賊竄路致賊竄出將朱德樹正法所有詳細情形已
於上年六月初入日據實陳奏續奉

諭旨當卽行知總統南路諸軍翼長道員周開錫並鈔
發朱積善原呈令按所呈各情悉心察訪以期確實嗣
據周開錫稟稱羅局之役朱德樹以逸令見殺遍訪宗
岳各營官哨長並無異詞朱德樹正法之時張騰飛尙
在草碧地方駐紮與李耀卿皆事後始知實無謬害情
事曾貴和是吳士邁在湖南岳陽公局時邀請襄辦局
務友人後入營辦事充當營官由戰功海保官職既非

家丁朦保屢次前敵帶傷撲寔勇往兼嫻律紀其餘各節均無寔據並取具張騰飛李耀卿曾貴和等稟復各件前來臣復核無異竊惟軍事以號令爲重令進則進令止則止統領以之鈐束營官營官以之鈐束哨官什長哨官什長以之鈐束兵勇違者得以軍法治之所謂軍法者明其與尋常法律不同耳自統領以至營哨節節相制然後驅之出入生死之地而不搖軍興以來制兵不足用各省皆募勇丁殺賊勇丁積功擢至提鎮副參遊者不可數紀其中驍健勇決而又稍識事體者固

不乏人然尙氣好勇驕恣橫暴強不可使者亦在所不
免其甚者且擁衆自雄公爲背叛矣晉文謀帥首稱詩
禮唐之岳牧多川詞人杜漸防微身勢所宜非果重文
寧而輕武備也軍營體制祇論事寄輕重不在品秩尊
卑有保至提鎮而仍當什長哨官者保至副參遊而仍
充親兵散勇者有在他軍充當統領而在此軍充當營
官在他軍充當營官而在此軍充當統領者時地旣殊
勢分卽異當統領者必節制營哨當營哨者必受節制
於統領固無他說也此案當崔禹等逆東甌之時吳士

邁飭朱德樹由北路繞出羅局之東朱德樹不遵調遣致
賊東竄岐山重煩兵力吳士邁官雖中書分察統領憤
朱德樹之違令殺之是統領以違令殺營官非中書殺
總兵也朱積善具呈控告以吳士邁爲故殺復牽砌多
詞攻訐已故之統領波及同事之營官不過圖洩私忿
爲朱德樹請卹地然究不能謂朱德樹之死非由違令
吳士邁之殺朱德樹爲有意陷害也使吳士邁於朱德
樹不遵調遣一節真臣據稟參奏請

真正法則軍令既行人亦無從竊議其後乃因病中憤

激速行正法致干專殺之愆而朱積善等遂得有所藉口臣原奏曾聲明使吳士邁尚存自應查參其於擅殺情節並無一字爲其出脫特以吳士邁旣已病故卽查參具

奏亦已法無所加而徒啟營伍玩視軍事之漸於隴中時局尤覺非宜朱積善因圖爲朱德樹請卹故追恨吳士邁又因無解於違令之罪故遷怒同事之營官並追敘咸豐二年吳士邁從前扼守洞庭湖口之失此竇怨仇私語不足爲憑至朱德樹以出裝布託隴州押取銀

兩則隴州委員湯敏稟臣有案臣比飭局墊償由宗岳

軍大餉內劑扣歸款其非曾貴和挾嫌搆陷不辨可知
朱德樹素以勇往見稱當時人皆惜其死而爲之不平
頃漢中鎮總兵李輝武亦以羅局之戰賴其排援得以
轉危爲安代懇請

臣念其從征最久無以爲家亦時深憫惻特不敢以
私情廢公上瀆

宸聰如蒙

恩施逾格曲予矜卹則

朝廷浩蕩之仁非臣所敢請也謹據實縷陳伏乞
皇太后

皇上聖鑒訓示施行謹

奏
同治十年五月十二日

搜勦竄賊疊勝摺

奏爲各軍搜勦鹽茶固原東西兩山竄賊疊獲勝仗現
在辦理情形恭摺馳陳仰祈

聖鑒事竊平涼府屬鹽茶廳固原州所轄東西兩山界
連甯夏鞏昌慶陽涇州各府州地方千餘里巖竅複沓
溪回雜處素爲藏奸淵藪臣疊飭各軍窮搜遍緝以護
備道而靖地方擒斬首要各匪疊經馳報而賊計愈猾
往往守孛於河州各賊巢勾結外匪每起數百騎或數
十騎剽掠兩山間見官軍至則避匿無蹤兵退復出倏

東修西陲忽狎至與北方馬賊梟匪同而此間地廣人稀山谷盤互驅除尤爲不易疊據署平慶涇道魏光燾稟二月初三日所部前營副將魏紀整勦馬盤子股匪於紅羊坊一帶陣斬六十餘名初五日追及王家堡沿途斬賊七八十名初八日復搜斬十八名三生九名適新營副將蕭玉元後營副將鄭連拔由硝河城運糧回防行過天中溝遇賊騎二十餘狂竄而西遽追及之擒斬畧盡訊據賊供逆首馬盤子已帶重傷伏竅匿矣記名提督周紹濂派隊攻羅山謝家段頭各賊巢斬賊

數十生擒十餘名內有僞元帥袁希孟王添發兩名皆
金積未破之先馬化澂遣其出外求援未及歸巢者袁
希孟卽閻希孟兇悍尤著曾爲馬化澂守峽口以抗官
軍者也東山此段以預望堡地勢最爲險要向爲回目
馬添發所據馬添發伏誅復旌善營營官都司銜馬柏
森收用其夥馬彥隆李萬海嗣因其不服訓遣革遂之
馬彥隆李萬海心懷觖望三月初七夜刺殺馬柏森脅
其黨以叛周紹濂魏光燾聞變率隊圍剿賊知大兵將
至向毛居士井元城子一帶紛竄魏光燾派總兵于奇

汗副將蕭玉元追之遇賊下馬關陣斬騎賊七十餘名
生擒五名副將魏紀整追至元城子地方斬步賊十餘
名提督徐文秀自白坨追至十六夜三鼓襲賊於梨花
嘴山溝斬賊七八十名生擒二十餘名二十六日提督
戴奉勛由鎮原搜剿至楊家莊一帶斃賊六十餘名副
將李瑞林吳啟雲搜剿下馬關迤東一帶深山陣斬賊
黨十數名生擒賊目楊金潮寨宗丁阿渾及陝回四十
餘名而馬彥濬李萬海遂遠竄西山深處百草原中灘
一帶踞險爲巢與西山要道馬驛子李百寬馬才宗潛

相勾結李百寬者鹽茶廳屬賀家堡回首奮與逆同馬
忠海逸馬忠海伏誅後李百寬與其弟李百申李文虎
藏留馬忠海餘黨李文魁楊保祿及馬化滌之戚屬田
如貴懼官軍搜捕夥謀竄附河州賊巢三月二十九夜
勾河州賊數百挈眷潛逃適周紹濂遣所部游擊周署
良率右營馳抵鹽茶廳城得報會同署鹽茶廳同知范
廷樞潛師夜起襲之四月初一日黎明馳抵澗溝堡正
值該逆蜂擁前來周署良突起奮擊賊駭而奔官軍分
起追殺斃賊百餘名生擒李生雲馬五十二馬六個子

奪獲驛馬百餘頭將李百寬眷屬截轉賀家堡訊據賊
供李百寬同另股伏紅羊坊防官軍由前面截剿不虞
後路官軍驟至也十二日魏光燾飭所部前營副將魏
紀益搜捕雅牙兒灣一帶匪逆目馬彥澄由關門
山嶺至擊敗之賊折由鹽土溝一路東竄良回都司銜
穆進善率旌善二起馬隊拒之少卻收駐南峯洞賊仍
東竄穆進善馳報魏紀益出官馬套截刺行至黑溝口
賊已由沙台堡竄出魏紀益突起奮擊敗之賊由柯家
窰向庫窰南竄適提督左日升總兵于奇泮朱上林由

黑城子出隊截之朱上林率馬隊衝入賊中斬先鋒悍
賊十餘名而奪其馬步隊繼至賊敗折西竄是夜四鼓
魏紀整追賊至崖窰詢之堡民知有敗賊百餘騎在黃
葛灣急起掩之擒斬過半十四日黎明追至楊明堡收
隊十六日詎知河州賊匪另股馬步二三百竄踞條子
溝李百寬復帶騎賊百餘徑赴賀家堡接收眷屬適大
雨如注咫尺莫辨行徑魏紀整揣條子溝之賊必李百
寬要約而來意在阻官軍截剿以便接收逆眷宜先進
賀家堡截賊出路比發號疾馳行十數里至張家原則

李百寬已奪取通齊避雨窰洞燎衣作炊馬鞍盡卸矣
見官軍驟至紛紛出窰列拒魏紀整率親兵馬隊衝入
立斃執李字旗幟賊兩名馬步各隊分途齊至都司強
古魁馬隊哨長劉義縱橫盪抉斃賊遂多李百寬退入
窰洞賊營死壯勇丁何來幅差弁張貴元張吉飛及馬
隊軍功馬生德躍馬向前生擒李百寬比飭右後兩哨
狎犯赴堡子台而餘賊已護逆眷逸去魏紀整率馬步
隊追逸賊馳八十餘里沿途斃賊約百餘並將李百
寬李文虎眷屬發獲收隊回條子溝時已戌刻矣忽聞

堡子台砲聲不絕料必有事魏紀釜仍率所部由條子溝截去見堡子台來賊百餘與右後兩哨相馳卽躍馬衝入擒斬數十名騎賊四五十向種田溝敗竄詢之生賊蓋聞李百寬就擒相約來此劫犯也正擬追逐間適參將宋南山守備徐有禮由小溝收隊歸與此起竄賊遇奮威截殺誅滅殆盡又行數里至劉家井見各廢窖中火光騰灼知敗賊悉踞此間遂派隊圍定溝口督隊衝入盡數殲之此四月十六日魏光燾所部副將魏紀整剿辦逆回李百寬一起實在情形也同日據陸德轉

運局員通判張潤飛報署隆德縣知縣周其俊約駐十
里鋪護運馬隊營總十六日輕騎赴北路履勘形勢總
兵銜副將王有慶李松林隨身小隊同往行至距縣城
四十里野雞峴突遇大股騎賊千餘從山後突出眾寡
莫敵王有慶李松林周其俊同日陣亡馬勇戰歿者數
名臣於十七日午刻得信疑西山一帶向無千餘騎成
股之賊其時未知李百寬業已就擒意其糾合馬彥濂
等要逆及河州匪黨同來窺劫糧運也立調步隊三營
馬隊三營由瓦亭踰六盤山向北追剿又飭親兵左後

兩哨踰空同山繞化平川出龍江峽口而南出底店門
扇岔抵隆德冀得痛剿以盡根株二十六日得營帶副
藍旂馬隊副將尤成章飛報十七日由高堡台搜山到
新營川據探馬馳報不知何路突來賊百餘步賊二百
餘由硝河城南三十五里巴斗溝假充官軍攻破良回
王家堡肆掠逸去尤成章立即拔隊五鼓馳抵三岔口
上人告知對面嶺畔密洞微露火光即攻堡之賊住宿
處也尤成章即挑壯士傳口號夜斫賊館比踰溝登嶺
猶未覺壯士徑指火光明滅處大呼殺賊賊驚慌亂竄

昏黑中斃於亂刃者約數十名奪獲牛馬騾二十餘匹
黎明躡蹤追剿行五十餘里至雙樹地方賊見追軍無
多列陣抗拒尤成章率遊擊喻永勝千總孫成德下馬
挺矛衝入賊陣手斬黃衣賊一名而奪其馬砍斃手
執方白旗賊口一名喻永勝肩受礮子傷一處胸脅受
刃矛傷四處孫成德而受刀傷尤成章衣被鎗子穿透
數處猶奮威督隊力戰斃悍賊數十賊始大奔將士蹣
跚追猛速賊之擠墮澗壑自相蹂藉死者無數奪獲大小
洋砲十餘桿戰馬牛騾共八十餘匹並奪回五起馬隊

先鋒旗一暨生擒回逆數名斬首軍前訛據新裏回民
馮瀛海及活賊口供所斬黃衣賊目爲馬才踪十六日
野雞峴賊王有慶李松林周其俊者卽此賊也人馬約
共三百有奇始知隆德所報賊騎于餘不足信臣前疑
李百寬糾合馬彥濛等伺尋糧運者亦非也二十四日
靜甯防軍記名總兵吳隆海調城援州西北八十餘里
王家溝急起擊之斬悍賊四名二十五日追至焦家河
上王家一帶擒斬二十餘名拔出隴西鎮被裹漢民十
巨名收隊回防所擊者卽此起敗賊也錄已控不能爲

隆靜北路之患矣竊惟臨固東西兩山首要各逆均已陸續擒斬臣於正月二十五附片陳明並聲敘未獲逆目惟狗齒牙子靖遠等子馬才棕馬母驢閻希孟金添妄等數犯續據該提督周紹濂報捕斬閻希孟金添妄近復據報靖遠等子帶傷後昇至乾鹽池身死馬母驢即沙母驢子已經提督楊世俊陣斬茲馬才棕復經尤成章陣斬除狗齒牙子聞已逃赴河州尙無確耗此外著名各逆均已伏誅而李百寬一股又已殲滅俟搜捕馬彥濼李萬海等餘匪東西兩山周千餘里間伏莽盡

除運道無虞梗滯矣所有此次搜剿最爲出力之湖廣
補用副將剛勇巴圖魯魏紀鑿儘先補用副將堅勇巴
圖魯尤成章勇敢耐勞赴機迅速均請

賞換清字勇號都司銜穆進善王益禹本係良回從征
奮勉斬馘甚多應請以都司補用並

賞加遊擊銜陣亡之總兵銜補用副將王有慶李松林
署隆德縣知縣留甘補用同知周其俊均請

飭部照例議給

卹典以示激勵伏乞

皇太后

皇上聖鑒訓示施行謹

奏

同治十年五月十二日

同治十年五月二十日內閣奉

上諭左宗棠奏官軍搜剿竄賊叠獲勝仗請將出力陣亡各員獎卹一摺甘肅鹽茶固原所轄東西兩山時有賊匪勾結剽掠經道員魏光燾率隊追剿擒斬多名將逆首李百寬擒獲逃竄之賊斬殺殆盡其隆德靜寧兩處竄賊亦經副將尤成章總兵吳隆海督隊馳擊陣斬

首逆多名東西兩山伏莽盡除運道無阻剿辦尙爲得手仍著左宗棠飭令各軍遇賊卽擊以期盡絕根株所百此次尤爲出力之副將魏紀釐著賞換硃色巴圖魯勇號尤成章著賞換瑚松額巴圖魯名號都司銜穆進善王益禹著以都司補用並賞加遊擊銜副將王有慶李松林署隆德縣知縣同知周其俊均著交部照例議卹該部知道欽此

南路各軍剿賊獲勝片

再南路官軍剿賊獲勝情形業於四月初八日馳報在

案拜招後旋據漢中鎮總兵李輝武報稱四月初一日有回逆約數百假裝官軍馬隊竄至兩當總兵文德盛迎擊於簸箕灣敗之賊竄徽縣娘娘壩初二月二鼓徽防提督胡國珍總兵蕭德林截賊於場外山旁獲勝斃賊甚多生擒萬海明等十餘名初三日賊由前川向秦州屬境竄去統帶奇捷馬步等營提督楊世俊一軍前經周開錫檄令駐紮秦州秦安適中之石佛鎮初五日偵賊游駛秦屬雙溝窪王家河趙家山一帶掠劫糧運楊世俊當飛調各營自北而南初七日四鼓飭馬隊張

兩翼猛撲雙溝窪王家河以扼其吭步隊跨趙家山脊
自上壓下直搗中堅該逆勢不能支官軍四面環擊陣
斬三百餘名生擒四十餘名追殺五十餘里據擒賊供
稱此股頭目係河州馬秀馬貨郎麻哈等由安定康家
崖竄出此外尙有悍目馬榮蘇萬祥劉羊等各率黨分
竄意圖合股擾運不料猝遇官軍馬秀馬賀郎俱被斬
於陣餘眾殆盡另股東竄之賊折擾禮屬鹽關一帶楊
世俊度其必循古城西遁也初八日四鼓潛師於禮屬
麻子溝鹿家山待之天未曙賊果至伏起突擊衝賊爲

敵段馬步縱橫掩擊陣斬百餘名生擒三十餘名漏網者僅十餘敗賊耳適得賊劉羊以二百餘騎擾及秦屬梁家大莊楊世俊於是夜討軍劉家河初九日藤食奮擊斬敵百餘級賊向西狂奔追九十餘里於伏甯屬之包家莊大草灘及之斬劉羊於陣初十日窮搜崖壑已查無賊跡矣計先後驚賊三四百名生擒六十餘名奪獲騾馬一百五六十匹器械無算我軍陣亡勇丁三名受傷四名而已此秦徽伏甯禮各屬剿賊獲勝實在情形也其竄擾甯遠屬馬力坡一股數百騎三月二十八

日總理宗岳軍營務提督張仲春訓知賊騎擾及甯遠屬之西溝卽出隊掩擊二十九日行抵西溝短兵相接立斃悍賊多名四月初一日賊駛至禮屬靈芝山王家寺各處張仲春連日冒雨窮追飛飭所部仁義禮信各營分股痛剿初三日敗賊於王家寺鉛礮矛刺死者二百餘人殲賊目何二於陣初五日探悉另股賊目由娘娘孀鹽關竄至伏羌屬楊家寺張仲春卽拔隊馳赴固城度賊必由東溝竄走設伏伺之初六日黎明賊騎擁至官軍奮起迅擊盡抉縱橫賊屍枕藉追殺五十餘里

奪獲騾馬百餘匹初八九十一等日攔剿包家莊謝家莊等處均迭有斬獲我軍陣亡三名而已生擒賊目張善善子張馬逢楊復子數名解赴周開錫行營正法見派隊波別山谷此張仲春一軍西禮伏甯各處剿賊獲勝實在情形也其另股賊於三月二十七日由娘娘壩各處竄擾觀音店復經管帶虎威中營總兵田達考管帶楚軍左路鎮西營道員田應龍連日窮追四月初三日分率所部一扼龍潭壩截其竄徼之路一馳抵徐家溝口緊躡賊踪各嚴陣以待登高瞭望見賊驟忽游駛

慮其有伏道員田應龍率所部親兵鎮西營左右哨折
回溝西防抹援溝口之賊總兵田連考飛派虎威中營
幫辦田得勝哨官田慶先由東路進鎮西營幫辦文仕
茂帶哨官田興餘進左已革總兵熊煥章帶鎮西營前
後哨進右田連考自領親兵中哨哨官吳有恆居中策
應候選縣丞田治元督隊衝突身受重傷陣稍却賊鋒
擁合圍我軍排陣抵禦鎗矛齊施正酣戰聞忽溝西炮响
道員田應龍率哨官王仁和及副將謝復慮馬隊自溝
西馳至田連考突圍合攻斃賊百數十名賊拚命奔竄

又追殺百餘名生擒八名窮追十餘里奪獲騾馬百餘
頭器械無算我軍陣亡勇丁二名虎威鎮西兩營受傷
勇丁二十餘名而已二十五日復截於柳家溝斃賊數
十生擒二名奪騾馬十餘匹此田連考等連日截剿逆
回之實在情形也其餘之賊向通渭回竄會甯二十七
日駐通渭之二起馬隊總兵銜副將李華擊之於曹家
川斃賊三十餘名奪鎗械三十餘件賊馬四匹牛騾五
十餘頭臣維竄匿河州之賊多係甘南及鹽茶固原會
甯安定敗殘餘孽而秦川屬鹽關禮縣逆回亦頗烟跡

其間零騎偷竄固所不免幸退無可據之險進無可掠
之食旋旋滅固無能爲患也所有南路各軍剿賊獲
勝情形理合據實馳陳伏乞

聖鑒訓示謹

奉 同治十年五月十二日

進規河州一時未能進取

再正拜摺聞欽奉

寄諭前因金積堡克復後疊經諭令左宗棠將如何移
營進剿之處妥籌布置近聞河州回股於四月初間竄

擾兩當徽縣一帶旋向西去十六日隆德縣知縣周其俊會同馬隊遇賊於馬厰野雞岷地方接仗陣亡隆德固原一帶匪踪出沒無定兼之叛回馬彥濬黨眾百餘騎潛伏其間並聞另股回匪在秦州西六十里舖剽劫攻破管子鎮以南民堡一處經官軍追擊於初八日至禮縣所屬長道鎮地方接仗挫敗十四日又有回匪千餘騎竄擾娘娘壩高橋延擾牡丹園等處秦州北鄉暨會地方亦有賊踪紛擾此股回匪若有三千餘眾由河州潛渡洮河長驅東下現在盤踞雷遠縣之馬塢新寺

一帶分股四出以擾後路糧運似此情形賊勢甚爲猖獗著左宗棠將近日軍情確切查明其奏前據奏稱調派劉明燈等所部分向安定靜甯等處挽運軍糧以規進取諒該大臣必已全局在胸速籌辦理第恐所部將士或因金積既克北路粗定遠爾志驕意滿漸形懈弛甚至觀望遷延不遵調遣此等軍營惡習亦難保其必無現在河州賊勢方張正當激勵諸軍鼓行而西滅此朝食不可玩時愒日坐失事機仍著將如何籌辦情形迅速奏聞以慰廑系將此由五百里諭令知之欽此竊

惟鹽國東西兩山及甘南一路賊踪忽官軍叠次剿
辦獲勝擒斬賊目多名現籌辦理情形經臣據實陳明
諭旨垂詢各節多與陝甘兩省交界州縣探報大畧相
同而各軍營稟報則有合有不合四月初八日官軍無
遺賊至禮縣長道鎮接仗挫敗之事娘娘壩高橋牡丹
園本係一路相距不遠並無千餘騎竄擾之事至秦州
北鄉鹽合城若有回匪三千餘由河州潛渡洮河長驅
東下現在盤踞甯遠縣屬馬塢新寺一帶分股四出以
擾後路糧道一節臣處並無所聞以勢度之亦必無其

事查河州轄境周四百餘里東自狄道州境渡洮而西與西甯接土回頭目之著名者馬尒大馬占鼂馬阿渾劉阿渾尒鄉約臨洮謝大師外尙有撒拉番回內八弓外八弓頭目老阿渾等股數甚多近來未嘗入犯其入犯者多甯靈鹽固一帶及秦州各屬敗殘土匪之遷徙河州者人數零雜並無大股其入犯也必由洮河下游三甲集康家莊渡洮船小溜急雖有大股亦難徑渡且賊之所以能逞其巖忽狎至之技者正以人少則運掉易靈若多至數千復盤踞一處則官軍合力攻取尙易

爲功矣。如果三千賊騎盤踞甯遠新寺馬塢，則西北踞鞏昌，不過百餘里；東南踞秦州，亦不過二百餘里；鞏秦豈無急報，何以兼旬之久，臣處迄無所聞。大抵軍中探報踞城較近，各營尙有可信。若州縣營汛報則皆塘兵差役道聽塗說，數十里百餘里外，捕風捉影之談，毫不足據。至隔省所得傳鈔探報，又事後捕風捉影之談，更無論也。前此劉典因西北兩路甘肅探報互異，遽報陝回大股回竄，范銘叛卒各處探報傳聞異詞，卽其明證。臣雖隨時一一陳明，至今仍可覆按尤賴。

朝廷主之於上浮詞無能榮惑

聖聰臣壹意仔屑得支全隴敗壞殘局不致因多所顧

忌易其初心然曾參殺人慈母投杼樂羊斂敵謗書盈
篋古已有之臣固不敢援此以自解竊惟軍事尙質實
忌虛浮虛浮之弊起於訛誤者有之起於意見者有之
臣秦頽軍事十有餘年收仗則報在人先勝仗則報在

人後經勘定地方從無大股竄踞重煩兵力之事蓋愚
拙之效可觀者如此至進規河州之舉臣前奏已畧及
之現時遞運三個月糧料草束尙未竣事若急於前進

則隨運隨耗後無可繼之糧河州夏收約在六月底秋收約在七八月若急於前進則未及成熟前無可因之糧非穩著也又洮河深淺廣狹隨處不同而溜勢湍急與黃河無異由狄道安定隴西進兵每路皆須造船架橋所需器具亂後人物凋殘勢難咄嗟立辦而鹽固東西兩山餘匪及甘南一帶餘氛均應趁此閒暇逐加料理以免後顧之虞防軍未移之先無旬不有戰事亦非坐食虛糜可比察看近日軍情並未稍涉驕惰臣亦不

敢因

臣明誥責之嚴故爲諉謝也所有統籌全局進止遲速
機宜容候詳呈謹先附片馳報伏乞

聖鑒訓示謹

奏 同治十年五月十二日

軍機大臣 字寄同治十年五月二十日奉

上諭左宗棠穆圖善奏南路各軍剿賊獲勝等語鹽固
一帶敗殘餘孽句合河州回逆竄擾秦州徽縣伏羌甯
遠禮縣各屬經在事各軍相機截剿殲斃逆首馬秀馬
貨郎劉羊等多名餘孽亦擒斬畧盡其另股竄回亦經

提督張仲春總兵田連考兩軍分路兜擊斃賊極多敗賊向通渭回竄會甯卽著左宗棠穆圖善督飭各軍實力防剿務將殘賊搜捕淨盡勿使賊氛再有紛擾以固南路邊防左宗棠另片奏遵覆河州等處軍情並進規河州一時未能進取各情形覽奏均悉軍營探報遠近不一傳聞容有異詞朝廷既有所聞卽不能置之不問該大臣惟當仰體朝廷西顧之殷將進兵機宜悉力籌畫並激勵將士殺敵致果迭奏膚功用副委任正無容瀆辨爲也將此由五百里各諭令知之欽此

軍機大臣 字寄同治十三年五月十三日奉

上諭定安金順奏甯夏西岸三縣回匪剿辦完竣請將
道員汪景度簡用定安奏西來回匪滋擾烏拉特旗界
內金順奏請將管站各員獎勵各摺片覽奏均悉納家
聞賊巢業經攻克甯夏甯翔平羅一律肅清本日已明
降諭旨將定安金順張曜交部從優議敘出力各員照
請獎勵矣其投出回民業經定安金順分起發交地方
官安置靈州逃來之回亦解交該州收管著左宗棠張
曜仍隨時密爲查察妥爲鎮撫毋令再滋事端金順現

應前赴烏里雅蘇台將軍新任甯夏一帶如尚有潛匿
餘匪著張曜統率各營認真搜捕務絕根株陝回尚有
老弱男女五百十五名口應否解至平涼安插著左宗
棠會商金順張曜妥籌辦理甯夏軍事現已完竣金順
張曜所部兵勇應如何分別撤留或包頭纏金一帶有
須添兵防剿之處著定安金順張曜悉心會商妥速籌
辦阿拉善鄂爾多斯等旗並殺虎口等處管站各員接
遞文報尙無貽誤著定安查明擇尤請獎毋許冒濫道
員汪景度已交軍機處存記密片一件留中西來回匪

由阿畢爾密特旗竄至白任濠資及古爾班賽坎一帶
分路搶掠嗣有賊匪三百餘人竄至烏拉特中公旗境
內在庫克鄂爾濟巴克那等處擄掠續又在中公所屬
之洪庫勒塔拉民屯盤踞烏拉持旗在黃河之北直達
歸綏無險可恃亟應派兵兜剿以期就地殲除薩薩布
帶隊前進計正與賊相遇著定安飛催該副都統親督
全軍星速邁行迎頭截擊逆氛並催直字營馬隊
迅赴包頭之西一面分飭駐紮纏金之卓勝營暨大同
鎮總兵馬陞各派勁旅由東南而節節兜剿毋任分竄

杜嘎爾務當偵賊所向躡踪追剿與薩薩布等軍前後夾攻爲一股聚殲之計其餘各股現竄何處著定安杜嘎爾確切查明認真剿辦烏城軍情緊要非有知兵大員前往不足以資調度金順諳練戎機戰功卓著著卽迅速起程前往妥籌防剿以副委任土爾扈特漢布彥鄂勒哲依圖有赴杜嘎爾官營之說該副都統與該汗是否素識曾否前來謁見來見時如何情形著杜嘎爾卽行據實奏聞將此由六百里諭知左宗棠定安金順杜嘎爾並傳諭張曜知之欽此

軍機大臣 字寄同治十年五月十九日奉

上諭金順奏甯夏回務已竣現籌分兵布置一摺甯夏
爲北路巖疆刻下雖臻靜謐而西路賊氛尙熾自應分
布設防以資捍衛金順會商張曜分派各隊扼紮磴口
橫城等處所籌尙屬周密金順啟程後卽著張曜督飭
派出各軍嚴密防剿毋稍疏虞河西三縣投誠之回均
已造冊交地方官編立保甲妥爲安置其附逆之徒均
由受害漢民指名控告者亦經金順等搜獲正法至四
百五十餘名之多該回經此痛剿自當懷德畏威不至

再生反側惟附近漢民亦不得有意尋仇致成罅隙本
日明降諭旨一道著張曜刊發膾黃遍行曉諭俾漢回
永遠相安以副朝廷一視同仁至意阿拉善旗地方既
有西東竄匪搶掠牲畜之事張曜自當飭令馬步隊伍
進往防剿勿任蔓延花馬地一帶亦有匪踪出沒左宗
宰當撥飭東路官軍實力剿捕張曜仍妥籌兼顧毋稍
疏懈河州等處逆敵方張左宗棠總當激勵諸軍鼓行
而西滅此朝食豈可頓兵不進致軍心懈弛將士思歸
以勝兵而轉成暮氣該大臣自金積堡克復後久未據

報進兵機宜實深慮系著慎遵叠次諭旨迅將籌辦情
形據實具奏不得粉飾遷延致誤大局金順另片奏軍
營設局鼓鑄礮子需費甚鉅無款歸還請飭部撥銀二
萬兩以清款項並請飭河南撫臣覆發張曜局費等語
著袁保恆卽於西征糧台籌撥銀二萬兩清還金順鑄
礮局費其張曜營中礮局之需卽著李鶴年如數籌撥
作正開銷前據曾國藩奏續飭上海製造局造倘洋火
藥二萬磅洋礮藥五千磅金底大銅帽二百萬顆二十
四磅開花彈子四千箇藥引六千箇木心六千箇委員

解交天津道查點收存由金順委員迎提赴營等語著
金順張曜迅速派員赴津提解到營以應急需金順現
須前赴烏城此項軍火應如何分撥應用之處著張
曜妥商辦理將此由五百里諭知左宗棠金順李鶴年
並傳諭張曜袁保恆知之欽此

羅陳甘涼肅等處情形會籌布置摺

奏爲覆陳甘涼肅州等處情形會籌布置恭摺仰祈
聖鑒事竊臣等疊准軍機大臣字寄同治九年十二月
二十三日同治十年正月初二日欽奉

上諭以甘涼肅一帶兵力單薄恐北路敗逃餘匪乘隙
肆竄致成延蔓著卽派兵分投截剿等因欽此仰見
聖慈垂念邊陲無遠弗屆曷勝欽感查北路金積堡旣
平所有悍黨兇酋概經誅戮其老弱悉已安插平固之
間通昌通貴等巢窟併納中寨現經金順張曜率軍圍

攻據金順張曜絳梅逆勢窮蹙業已告蕪餘匪西趨當
可無慮而目前東西兩山零匪搜除未靖北路中路各
軍連難抽撥南路叛卒已平尙須留駐勁旅俾資鎮壓
且各軍將士血戰頻年久役者不免思歸積勞者亦宜
小息又西寧河州逆巢未掃蘭垣糧價高昂數月之內
臣尙須暫駐靜寧一面派兵進攻一面督率後路趕運
芻糧兼興屯墾庶不致因飢潰退欲速反遲西路相距
遙遠宗棠衰病之軀照料恐難周到非慎擇良將勁
軍足以調當一面者何敢率爾遣行而臣穆圖善所部

二十餘營駐守省垣分紮金縣平番及五道峴大靖土門等處分布尙屬不敷刻亦難於抽調臣等彼此咨商擬於河西肅清東西兩山零匪一律搜除淨盡臣宗棠一面派兵進規河州一面挑選得力之軍遵

旨派赴西路分投截剿應懇

天恩飭下豫師瑞雲暫就現有兵力嚴密堵遏狂氛勿任豕突狼奔致滋延蔓所有奉

旨派撥兵勇前赴甘涼肅一帶截剿竄匪刻難遵辦緣由謹合詞恭摺具陳伏乞

皇太后

皇上聖鑒訓示施行再此摺係臣宗棠主稿合併飛明

謹

奏 同治十年五月三十日

軍機大臣 字寄同治十年七月初六日奉

上諭前因甘肅甘涼肅一帶兵力單薄諭令左宗棠穆圖善派兵截剿茲據奏稱現在東西兩山尚未肅清南路亦須留兵駐紮西甯河州逆巢未掃左宗棠現駐鄯甯距西路遙遠穆圖善所部兵勇駐守省垣分紮金縣

等處均難抽撥請俟河西肅清零匪搜除淨盡再由左宗棠撥兵前赴西路等語甘涼肅地方緊要亟應妥爲設防卽著豫師瑞雲就現有兵力於各該處緊要隘口嚴密防堵遇有匪徒竄入卽行實力剿擊毋任該匪蔓延惟豫師瑞雲所部兵力無多如有大股竄入殊難堵禦仍著左宗棠穆圖善妥籌兼顧如西路緊急於無可抽撥之中設法派兵赴援以資得力將此由五百里各諭令知之欽此

恪靖奏稿續編三十八目錄

周開錫病故請卹摺

剿除竄回餘衆攻拔階州匪巢摺

敬陳進兵事宜摺

劉錦棠請假回籍摺

甘肅道府州縣再請展限片

剿賊獲勝暨搜捕零匪片

周開錫病故請卹摺

奏爲道員在營立功積勞病故恭摺馳陳仰祈

聖鑒事竊總統南路諸軍前署福建布政使延建邵道周開錫自本年三月以後舊患翻胃疾復發且劇然籌兵籌餉籌運造車船購驛馬一切鉅細諸務必躬親裁度措措不休每上臣緘牘商權進兵事宜娓娓千言並未詳及病狀臣亦不知其病之深也嗣得漳昌隨員來稟言總統病久不愈近亦不肯服藥怫鬱之餘肝氣上衝復添呃逆腹泄諸證病骨支離殊形委頓日間判行

案牘接見僚屬雖均如常然不能遠離卧榻五月初十日忽命昇疾赴秦州料理餉事行四十里氣垂絕復蘇提督嚴華廷復護歸鞏昌臣聞其疾甚亟遣人負藥往視甫行旋得涼州鎮總兵傅先宗署鞏昌知府湯聘珍馳報周開錫已於五月十五日寅刻身故先日得臣議進兵緘牘傳示諸將領並自云病不可爲惟活一日盡一日心幹一日事而已諸君勉之因口占一詩中有國事中興日家親垂暮時及何以報吾師之句神識湛然是夜氣絕無一語及私臣得報悲不目勝念甘南統

將勢分等夷周開錫既已病故正當進軍之際若別派
總統必不相宜卽飭總理營務前山西按察使陳湜馳
赴靜衛會諸將領籌辦一切臣俟北路中路布置定妥
諸營填紮畢卽率親兵繼進督之並飭駐陝總理軍需
局沈應奎由秦赴鞏銷算周開錫經手糧餉轉運各項
以免矛盾察看甘南軍情於周開錫病時祈禱備至死
後哀吟勿絕似人心尙或可待也竊惟周開錫師事臣
久素以古義相切劘自臣奉撫浙之

命周開錫辭會國藩隨臣入浙官溫處道臣入閩調其

補閩以延建邵道署福建藩司

臣奉調督陝甘之

命周開錫又辭福建輪船局提調來隴按其繼緒相隨

皆在臣艱危患難之日其在溫處道本任及福建藩司

署任內諸所施措成效均尙可考至總統甘南諸軍時

屢致人言周開錫於三月二十四日上稟懇請終養臣

批未准而上年六月克復狄道渭源兩城本年二月收

撫范銘漬勇各案臣確知周開錫勞績卓著始終未爲

請

叙茲周開錫已盡瘁而死臣不忍稍有掩抑謹照錄呈

以見外臣任事之難也所有總統南路諸軍二
品頂戴前署福建布政使道員周開錫應否照軍營立
功後病

飭部從優議給卹典之處出自

聖裁謹據實馳

奏伏乞

皇太后

皇上聖鑒訓示施行謹

奏同治十年六月十四日

軍機大臣奉

旨周開錫著交部照軍營立功後病故例議卹欽此

剿除竄回餘衆攻拔階州匪巢摺

奏爲南路官軍剿除竄回餘衆階州攻拔縉匪堅巢各情形恭摺馳陳仰祈

聖鑒事竊臣前將三月下旬河州零賊出竄南路各軍節節剿捕殲除逆首情形於五月十二日據實馳陳在案旋據總統南路諸軍道員周開錫稟報各軍戰狀大畧相同惟前此竄賊雖經剿滅殆盡而後路運道所開周開錫猶慮西禮徽成深山窮谷尙有伏莽兼除飭總兵蘇家良等各率馬步分途搜剿四月十三日蘇家良

等誦知成縣屬任家莊山頂有賊窟匿遂改騎爲步圍之忽一賊自賊中手提首級一顆跪陣前乞降蘇家良訛之自稱姓海名富兒所提首級則所殺小頭目看老五也查老五本陝回楊生公所部悍賊上年崔三等逆敗後楊生公潛赴提督傅先宗軍營求撫行至中途事覺爲崔三所殺餘衆復欲就撫又爲看老五所阻滋海富兒憤其屢梗撫議遂斬之以降蘇家良受之海富兒並呼願投誠者三十人呈繳旂幟伏地求撫其不願投誠者約尙八九十人仍偃蹇如故蘇家良等率隊猛撲

皆中礮墮崖死無一脫者遂收降回海富兒三十八以
歸點驗降人大半籍隸陝西年力精壯當飭令安插隊
伍中充餘丁立功自贖緣蘇家良以良回積功擢王總
兵所部本回騎也階州山谷叢雜最易藏奸向有結匪
一種據險爲巢時出肆掠爲地方患署知州道銜知府
洪惟善訪有段世才瞿煥周李奎者均積年渠惡自恃
險僻已甚白馬關雖有官軍分防無如何也前此逆回
闖入白馬關時段世才乘隙擄搶三月初二日回逆敗
竄洪惟善飭楚勇哨長副將彭德沅會商守備周正秋

率隊合力圍攻段世才匪巢並派哨往扼李奎洞口與小關嶺兩處另募卡勇六隊分紮距州城百八十里之太石山三十里之兩水里以防外寇一面派役訪拏著名匪徒褚正武黃萬明等防其勾結爲患知會白馬關州判烏堯松阿集團協剿嚴防竄逸布置既定彭德沅等於三月十二日逼近匪巢駐營出隊攻巢巢中礮石兩注迄不能下二十五日併力攻破頭卡立斃匪等十餘名餘黨縮退二卡拚死抗拒官軍據其頭卡以擋牌護劈山礮向二卡連番轟擊賊不能支是夜五鼓遂率

其黨羅嚴潛遁官軍燬卡而入起獲大礮三座抬鎗六
桿小鎗二十三桿其扼李奎洞口之哨勇亦於是日攻
破李奎巢穴生擒匪首李奎李俊張昭蒲煥軍楊仕得
等五犯烏堯松阿亦拿獲匪首段世才之母段楊氏及
其雇工鞏正明夥犯李毛娃之父李應收訊明後當將
李奎李俊張昭蒲煥軍楊仕得五犯就地正法餘均分
別省釋惟段世才尙未就縛洪惟善誦知該匪逃匿瞿
煥周所據之石崖洞內地勢尤險四月二十一日派縣
丞李芝瑞率隊掩捕是日抵瞿家溝分路進攻連破數

卡斃匪二十餘名比官軍攻擊達且忽洞中喧嚷聲起
均向洞左深林行走李芝瑞知賊潛逃揮所部突入匪
衆滾崖跌斃與鎗矛擊刺斃命者約二十餘名生擒段
世才之父段明德段世才之妻段李氏餘匪王三胖子
蒲友娃子王偽元帥等數名又沿途追斬二十餘名搜
獲鎗礮十餘件火藥數十斤當將王三胖子王偽元帥
蒲友娃子訊明正法惟段明德一犯及段李氏暫留未
誅訊據擒賊供稱段瞿兩逆已於是日四更時緝獲遁
走段世才有赴陝西畧陽漢中之說瞿煥周則擬追四

川廣元縣臣得報後當卽分別咨行四川陝西轉飭所屬一體協緝以淨根株所有南路官軍剿除竄回餘衆階州攻拔匪巢情形謹據實馳陳伏乞

皇太后

皇上聖鑒訓示施行謹

奏

同治十年六月十四日

敬陳進兵事宜摺

奏爲敬陳進兵事宜仰祈

聖鑒事竊甘肅回亂雖由陝回構衅牽連而起實則新

教久懷不軌卽無回牽連而亦不能保其不變適因
漢回結怨得所借口以迫脅其族類其變乃益速時值
東南軍事方殷重兵鉅餉難於分布不得不勉事羈縻
而玉關內外竟無完土矣茲幸

皇威震疊金積蕩平陝回窘蹙歸誠又經畫地安插

朝廷仁育義正之懷天下共喻回民雖善詐多疑自村
黨堅耐戰孰如陝西堡寨之密鎗礮之多孰如金積其
不敢妄肆鴟張固意中事也春間清水縣張家川撫回
李得昌自請赴河川諭撫馬尅大馬占鰲臣知爲州回

央托而來諭令聽其自投不准招致蓋自行投首准與
不准官操其權苟由招致而來設有不可撫者礙難處
置一涉操切轉無以信而服其心也李得昌行至
洪河東岸馬尒大等遞呈求撫適聞河西用兵心懷驚
懼疑李得昌之給已李得昌亦疑撫局有變忿懼而歸
嗣西路各郡縣見蕩平金積緣起告示又探知靈州平
涼固原化平川等處安插陝甘各起回民安居耕墾適
然無驚始悟撫局終無可疑馬尒大馬占鰲求撫之心
乃益切觀其於李百寬馬彥澄等投入河州時拒不容

留亦可概見此時言招撫固可省兵力而速戎機然以地勢言之河州西南卽漢唐河湟故地爲歷代戰爭之場蘭州東西南三面均緊連河州河州賊氛不靜蘭州不能解嚴以賊勢言之河回嗜利輕生性喜剽掠無事時卽常騎馬遠出鈔掠變亂十年未受懲創更無畏忌此等嗜亂之民非創鉅痛深固難望其永久帖服也現在甯夏平涼慶陽涇州鞏昌秦州階州各屬大致實已肅清販撫耕墾安插遷徙兵屯民屯善後諸務實已具有端緒雖中衛鹽固一帶時有遊匪出沒不常甘南之

徽兩西禮等縣亦時有伏匿之匪伺劫運道然統計實
不過數起人馬多者實不過數百少者僅數十而已倏
隱倏現如螽蟴著體殊費爬搜然固無能爲害現擬留
黃鼎雷正綰魏光燾左日升等各營自中衛至平涼扼
要分駐其南路徽兩一帶加派提督殷華廷馬隊護運
按緝遊匪一面慎選地方官會同各防營嚴密掩捕以
淨根株而重後路據各路稟報淨橋渡船已辦各營芻
糧軍用粗備道路修治已平乃檄各將領尅期會師而
前進規河州記名提督涼州鎮總兵傅先宗率所部馬

步由狄道進以其半渡洮而西修立堅壘以其半駐洮
東岸爲中路記名提督楊世俊率所部馬步隊及提督
張仲春宗岳馬步隊取道南關坪進峽城爲左路記名
提督劉明燧由馬營監進紅土窰由紅土窰進安定縣
掃除零匪以扼康家崖之要記名提督徐文秀由靜甯
州進會甯繼之爲右路俟中路渡洮之師修壘畢左右
三路乃渡洮繼進其岷州及洮州廳地居河州西南山
南以五營分駐兩城調土司楊元帶番勇守隘口
以備不虞

楊世俊調遣會甯西北安定東北均接

靖邊縣地境當北竄之衝檄黃鼎分所部步隊八營益以副將桂錫楨馬隊三營歸記名提督徐占彪統領由中衛進靖遠南搜會甯安定遊匪西顧蘭州臣俟諸路布置畧定卽率親兵由隆德赴靜甯安定督剿俟河州大宥乃圖西甯也西甯著名逆首馬尒三已於三月內自伏竄誅陝西崔三禹得彥白彥虎等逆近時兇焰頗形滑阻至甘州涼州肅州本無大股耐軋之賊惟未覩兵威故爾時形倔強如果鋤其桀黠寬其良愿辦理悉當人心則剿足令其畏撫足令其懷自可永期安謐臣

惟殫誠盡瘁慎以圖之不敢遷延以誤事機亦不敢草率而貽後患以求仰紓

宵旰憂勤於萬一伏乞

皇太后

皇上聖鑒訓示謹

奏 同治十年六月十

劉錦棠請假回籍片

再前據三品卿銜總統老湘全軍道員劉錦棠履稱該軍自臨淮選練整理以來時閱十載閩粵七年直東諸

清奉檄由洛趨晉由晉入秦掃蕩而西直平陝北土匪
逼金積血戰頻年各分統營官隨已故提督劉松山先
後死事者十居其四將士陣亡者約千數百名其傷殘
成廢積勞成疾者實二千有奇留其在軍不能出力而
徒耗軍食亟應分別撤遣回籍從新選補以期士氣常
新幸金積蕩平巨寇夷滅安插遷移諸已就緒懇請給
假六箇月扶劉松山遺櫬並帶撤回傷殘疲病將弁勇
丁回籍一面在籍選募有根著的保勇丁來營補額庶
免遊勇混雜致壞軍律臣維甯靈大局既定各軍宜酌

量遣撤湘軍傷病弁勇較多宜及時休養勇丁宜就原籍選募所稟均屬實在情形自應照准惟時河西軍務尙未告竣應否添兵助剿須詢明金順張曜得其覆音乃可定局飭劉錦棠先將傷病將弁勇丁分起資遣一面函詢金順張曜旋得覆緘知河西亦將歲事無須增調劉錦棠復申前請臣飭將挑留之精壯勇丁併爲十一營董字三營馬隊三營交記名提督蕭章開統帶分駐金積吳忠靈州甯夏各屬以資鎮壓劉錦棠卽扶劉松山輓回湘道出平涼臣與商布一切並飭令到籍選

募假滿卽來擬備西北一路之用也該軍餉由金陵解給除每月六萬兩尙源源報解此外惟曾國藩調在兩江後每月加解銀五千兩而積欠額餉及新四營月餉並車價馬價棚價米價柴草卹賞養傷等項約四十餘萬兩概屬虛懸茲當遣撤傷病之時臣不得不勉籌鉅款代爲墊發將來仍於金陵解到該軍月餉銀六萬五千兩內劃扣撤勇薪糧等項陸續歸款庶該軍積欠不致久懸而金陵亦可無須籌積積欠矣其金運昌一軍

已遵

旨調歸綏遠城將軍定安調度黃鼎一軍留五營駐中
衛各處並益以知州黃立熬一營總兵馮南斌一營撥
黃鼎所部馬步八營歸提督徐占彪統帶並益以副將
桂錫楨馬隊三營檄由中衛赴靖遠爲進規河州北路
之師陝西提督雷正綰還駐固原其固原以北至馬家
河則以雷正綰所部馬步七營及豫軍強營毅營分紮
填防臣率親軍西進當調提督周紹濂五營自隨由固
原以南至平涼則調平慶涇道魏光壽率所部五營填
防以昭周密所有布置北路中路各情形謹附片陳明

傳乞

聖鑒謹

奏同治十年六月十四日

軍機大臣 字寄同治十年六月二十三日奉

上諭左宗棠奏南路官軍剿除竄回餘衆攻拔階州匪巢現籌進兵事宜劉錦棠請假回籍各摺片覽奏均悉成縣任家莊匪經總兵蘇家良搜剿投誠者三十人著左宗棠飭令蘇家良妥爲安插毋令再滋事端此外有無伏莽仍著認真搜捕毋留餘孽階州緝匪經副將

彭德沅等率隊圍攻，破賊巢，惟段世才、瞿煥周在逃。未獲該大臣，當飭彭德沅等實力查拏，盡法懲治。賊供既有段逆赴陝、瞿逆赴川之說，著左宗棠咨照吳棠、蔣志章、飭屬一體協緝。毋任漏網。中衛、鹽固一帶時有遊匪出沒，綴兩西禮等縣亦有伏匪伺劫。運道左宗棠即派出各軍嚴密掩捕，以淨根株。現在該大臣規取河州，分中左右三路進兵，布置尙屬周密。左宗棠擬赴靜甯，安定督剿，卽著督飭傅先宗等軍分道前進，實力掃蕩。毋任河州逆匪日久盤踞。惟河州一經進兵，恐該逆被

剿窮蹙勾結西甯回衆竄甘涼等處該大臣於西路一帶尤宜妥籌兼顧以免匪勢蔓延劉錦棠現在請假回籍並將傷病弁勇遣撤另行募補著飭令到籍後認真挑選假滿卽行回甘以資得力其所留各營分駐金積靈州等處卽飭蕭章開等妥爲鎮撫前由金順遣回靈州回民當諭左宗棠飭令劉錦棠黃鼎遇此項回民抵籍剗行地方官箝束妥置現在辦理是否完竣著左宗棠查明具奏將此由六百里諭令知之欽此

甘捐道府州縣再請展限摺

再臣前因餉項奇絀於同治九年五月初六日

奏請將甘局收捐之道府州縣無論省局分局均展限
一年於是年五月二十日奉

旨著照所請戶部知道欽此欽遵通行知照在案茲准
西征糧台兼辦甘捐翰林學士袁保恒咨稱各省甘捐
除湖南湖北廣東三省改歸黔省專辦江蘇浙江福建
改由各本省統收分解甘黔皖三省收用四川一省係
甘黔皖各設捐局其捐收甘捐省分僅山東山西河南
陝甘等省統計甘捐省分已減過半若再將道府州縣

雙月三班及班次分發等項收捐停止則所收捐款無多軍餉愈形支絀請再爲奏懇展限一年等因臣查甘捐之設原爲接濟軍餉今專收甘捐省分僅山東山西河南陝甘等省若再將道府州縣雙月三班及班次分發等捐遽行停收則捐項愈少於餉精更屬無補現屆展限期滿捐生未免觀望相應請

旨再容展限一年如蒙

俞允臣卽通行省局及各分局一體遵照以廣招徠於軍需冀有裨益理合附片具陳伏乞

聖鑒訓示施行謹

奏同治十年六月十四日

軍機大臣奉

旨著照所請戶部知道欽此

剿賊獲勝及搜捕零匪片

再臣前調提督劉明燈一軍進駐馬營監轉搬軍糧以規進取據報五月二十日親督所部各營隊伍護送回秦州運濟蘭省軍火並擬便道搜剿零回途中訶知先夜四更時有賊數十名襲據通渭安定隴西交界之李

家溝廢堡劫掠糧畜當派正中右後三營隊伍分途馳剿僅留前左副中三營隊伍護送軍火旋據各該營官回報軍抵該處賊已遠颺居民均已歸堡二十二日將軍火交替接護前進二十四日率隊回防當據花鼓樓堡民報稱隴西屬之八里灣有竄賊馬步數百名意圖攻堡劉明燈當派正中營總兵王前程率正中營步隊及參將楊正茂西征馬隊馳往援剿是夜三更後步隊先抵距花鼓樓二十里張家堡調知賊伏深峽溝廟內王前程當令各哨卽夜圍攻乘其不備四鼓銜枚疾進

黎明步隊悉已抵廟前賊倉卒出敵官軍鎗礮齊施刀
矛並進立斃賊七十餘名生擒十四名奪獲牲畜十餘
頭賊悉棄械狂奔官軍乘勝追殺斃尾賊四五十名前
賊回顧追兵甚緊倉卒開躍避土洞以圖苟免官軍結
繩放下擬縋出斬之殊賊固匿不出僅一人附繩而上
訊係義岡川漢民吳香香子據供賊匿土洞者約尙有
八九十名知縋上必死希俟官軍收隊再出也官軍計
無所施乃傾土石入洞中但聞洞中號呼之聲甚慘迨
填厚約數尺許聲止而賊已絕矣復追搜餘賊行十餘

里不見踪跡始收隊回防提訊活賊據供此股頭目馬老五本鞏昌回民上年逃入河州五月初六日始由康家崖竄出其西山遊匪據提督周紹濂稟稱五月二十日後營總兵周玉林率步隊及王鎡萬馬隊搜山至駝廠堡小有斬獲六月初一日搜至奧蒿灣斬賊數十名生擒逆目田如貴等四名奪獲刀矛二十餘件牲畜十餘頭訊知田如貴本馬化澁之戚屬五月十五日甫由河州竄出圖勾結黨夥劫掠糧運斬之左營管帶官總兵李良穆稟稱六月初二日黎明訶有騎賊二百步賊

七八十名由後河竄至官軍整隊迎擊陣斬步賊二十餘名騎賊中礮落馬者甚夥賊敗竄後河官軍跟跡緊追賊分十餘起拚命衝突官軍隨賊所向擊之適大風捲地雨雹交作賊悉由北路竄出比雹止復追則賊去已遠五月十九日平慶涇道魏光燾飭前營副將魏紀盜搜捕趙家塬踞匪擒斬回目馬得魁等十餘名二十一日後營副將鄭連拔擊賊中田溝斬賊十餘名奪馬七匹六月初二日賊目馬彥濛所裹良回楊保俊手刃首賊馬柏森之賊馬成禮並帶同馬勇十八名赴總兵

于奇洋營前乞撫受之現正飭各軍上緊搜捕各起零
匪計可漸次肅清所有中路官軍剿賊獲勝暨搜捕西
山零匪緣由理合附片陳明伏乞

聖鑒謹

奏同治十年六月十四日

軍機大臣 字寄同治十年六月初十日奉

上諭左宗棠穆圖善豫師奏陝回勾結西甯回族滋擾
派兵堵剿一摺陝回分竄西甯攻破高寨成遠等堡接
及高羌堡黃家寨一帶經總兵黃武賢派隊堵剿並獲
勝仗惟逆首白彥虎率黨攻陷小南川漢堡踞爲巢穴
崔三一股仍踞曹家堡分黨潛伏高寨馬生彥股眾與
爲犄角並有金積堡敗匪竄至與西甯回民聯爲一氣
河州回目馬占鰲等亦率散回攻陷民莊西甯回族就
撫本不足恃現在外匪紛至與之勾結勢恐蔓延穆圖

善現已檄令黃武賢率領三營會同豫師原駐威遠營
勇調集西礮各路團丁相機堵擊卽著督飭派出兵團
認真剿辦毋任賊勢鴟張西寧地方賊股充斥豫師兵
力既單糧圖善駐省各營勢又不能遠調左宗棠當統
籌全局迅卽撥隊馳往助剿痛堵妖氛其應何如籌辦
布置並現擬進紮何處河州回巢應如何進兵分路進
剿均著詳悉具奏赴滬通路雖梗豫師仍當設法剋期
前進不得濡滯中途以重職守私圖善另片奏未能撥
兵兼顧西路等語甘省北路雖漸肅清而敗殘餘匪竄

向河州西甯等處陸續由甘涼遁入肅州若左宗棠進
兵規取河州賊勢窮蹙必以西路爲遁逃藪自應添撥
兵勇扼守西路方足制賊死命穆圖善所部保守省城
護運糧石未能移調前往自係實在情形甘涼兵力過
單難資扼剿左宗棠統轄全省西路應早籌及仍著迅
速撥兵協剿毋得稍涉遷延致滋貽誤穆圖善亦應督
率近省各軍隨時扼剿竄匪與左宗棠和衷商辦不可
稍分畛域左宗棠穆圖善另摺奏剿辦山丹土匪及甘
州賊股情形已明降諭旨將出力及畏縮各員分別獎

勸懲辦矣仍著左宗棠等飭令楊占鰲督率所部加意
防範毋令賊匪乘間奔突以靖地方將此由五百里各
諭令知之欽此